

CARTA HN JEE NI TEE SAN PABLO APOSTOL NUU ÑAYUU ÑUU CORINTO

1 Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndindúú rí jín hermano yō Sóstenes ²cátee ri carta yáha cuájeē nuū rohó ñáyuu ñuu Corinto jeē cácanđije ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jínáhan ró jéē coo ndoo coo iī rō nuū yā. Te ni cana ya rohó ndé jín táca gá ñayuu jeē ndácunehen i máá Jítóho yō Jesucristo, ndé-ni cúu nuū cáhīyo i. Chi Jítóho táca yó jín i cúu ya. ³Te cáñuhun ni rī jeē Tatá yō Yaā Dios jín Jítóho yō Jesucristo na sáha ga yā jeē váha rōhó, te sáha ya jeē coo ndeyí coo sīi ni rō.

Cristo sáha ya táca jéē váha yóhó

⁴Te níní nácuatáhú rí nuū Yaā Dios jeē siquí rohó jijnáhan ró, chi jeē jín Cristo Jesús ni sáha ya jeē váha rōhó. ⁵Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúcá ró jín táca jnúhun ya, chi cájecūhun vāha ni rō te cúu nácani ró. ⁶Chi súcuan cúu jeē cáhīin nihin ró jín jnúhun

Cristo jeē ní canacani ri nuū rō.

⁷Te súcuan te tu cúmanī ni iin tahū jeē jéhe ya cuu ánuá rō níní jéē cándetu ró quívī jeē quenda ndijin Jítóho yō Jesucristo. ⁸Te máá yá chi sáha ya jeē cuiñi nihin ró nde na jínu quivī, návāha ma cóo cuēchi siquí rō quivī ndiji Jítóho yō Jesucristo. ⁹Te squícu Yaā Dios táca jéē ni jéjnūhun ya, te ni cana ya rohó jínáhan ró návāha cuni jnáhan ró jín Séhe ya, Yaā cúu Jítóho yō Jesucristo.

**Siquí jeē ma cóo sīin
ni i jín jnáhan i**

¹⁰Hermano, nde jín síhví Jítóho yō Jesucristo cahán ndahú rí jín ró jeē inuú-ni na ndájnūhun ró jijnáhan ró, te ma cóo sīin ni rō. Chi vāha inuú na cóo ni rō jín táca jéē cájeni ni rō. ¹¹Súcuan cáhán rī, ñáni mánī, chi ni cacastūhun ñáyuu vehe Cloé nuū rī jeē cátejnéhan ró. ¹²Chi táca iin iin ró sīin sīin cácahān rō: Ruhū chi jín Pablo índichi rī, cácahān sava ró. Te sava ga rō: Ruhū chi jín Apolos. Ruhū chi jín Pedro. Ruhū chi jín Cristo. Cácahān rō. ¹³Te jeē cácahān rō súcuan éte á cájeni ni rō jeē sīin

síin Cristo iyó jéé cánacani ri jnúhun? ¿Te á rúhū Pablo ni jihī jicā cruz jehē rō? ¿Chí jíin síhví rúhū ni cajendute ró, chí naún? ¹⁴Tú cuiti. Te na cútahū rī nuū Yaā Dios jeē tú cuehē rō ni scuándute ri, chí mǎá Crispo jíin Gayo-ni, ¹⁵návāha ma cahán ni ìin ró jéé jíin síhví rí ni jendute ró. ¹⁶Te sá núcūhun ni rī jeē suni ni scuándute ri Estéfanas jíin ñayuu vehe de. Te sanaa te súcuan-ni cúu ñayuu ni scuándute ri, jéni ni rī. ¹⁷Chi tu ní téjníñu Cristo ruhū jeē scuándute ri, chí sa suhva jeē nácani ri jnúhun jeē jnáma ya ñayuu. Te tu ní ndúcú rí jeē steén rī nuū rō ìin modo ndichí jéé ma jécūhun ni rō, chí núu súcuan te ma cúu jecūhun vāha ni rō jnúhun jeē ni jíhī Cristo jicā cruz.

Jíin Cristo ni steén Yaā Dios poder yā jíin jnúhun ndichí yá

¹⁸Te jnúhun jeē ni jíhī yā jicā cruz jeē jnáma ya ñayuu, chí jnúhun cánéé íi cúu nuū ñayuu cuangoo nuū jnahnú ndetū. Te mǎá yó jeē cuahán yō nuū cácu yó, chí jíin yō jeē jnúhun Yaā Dios jeē ndíso poder cúu. ¹⁹Chi suhva yósó núu tútu ìi jeē ni cáhān Yaā Dios:

Na snāā rī jnúhun ndichí
cácahān ñayuu ndichí cuenta
ñayīvi yáha,
te ma cuátáhú rí jnúhun
cácahān ñayuu jeē jéni ni jeē
jiní vāha.

Achí yá.

²⁰Núu súcuan ¿te ndé cuajníñu tēe ndichí cuenta ñayīvi yáha, jíin tēe cástéén tutu, jíin tēe cánanducú yúcún síquī jeē steén ñayuu ñayīvi yáha? Chí tāca jnúhun ndichí

cuenta ñayīvi yáha, ni cahān Yaā Dios jeē jnúhun cánéé íi cúu. ²¹Te yōhyo ndichí sáha Yaā Dios. Chí tāca jnúhun ndichí cájini ñayuu ñayīvi, ni cachi ya jeē tu jéjníñu jeē cúni i ndese Yaā cúu ya. Yūcuán na te ni nujnahan ni yā jeē jíin jnúhun ya jeē cánacani ri te jnama ya ñayuu cácañdije, vēsú cájeni ni ñayuu ñayīvi jéé jnúhun cánéé íi cúu.

²²Chi ñayuu hebreo, máni cácuni i jeē sáha Yaā Dios cuehē jniñu jéñu jeē steén poder yā. Te ñayuu griego chí máni síquī jnúhun ndichí cándihvī ni i. ²³Te mǎá rí chí sa suhva cánacani ri jnúhun jeē ni jíhī Cristo jicā cruz jeē jnáma ya ñayuu. Te jnúhun yáha sáha jeē jnánini ni ñayuu hebreo, te ñayuu tāca gá nación chí cájeni ni i jeē jnúhun cánéé íi cúu. ²⁴Te ñayuu jeē ní cana ya ni quīvicoo ndaha ya, vēsú ñayuu hebreo chí ñayuu griego, chí jíin i jeē jíin Cristo ni steén Yaā Dios poder yā jíin jnúhun ndichí yá. ²⁵Chi jnúhun Yaā Dios jeē cácahān ñayuu jeē jnúhun cánéé íi cúu, yōhyo ndichí gá vēsú jnúhun ndichí ñayuu. Te cájeni ni ñayuu jeē tú na poder yā ná ni jihī Jesús jeē jnáma ya yohó, te tuú chí nihin téyí gá poder yā ún vēsú poder ñayuu. ²⁶Hermano, mǎá ró cácu jeē ní cana ya ni quīvicoo ró ndaha ya. Te condēhe ró jeē tú cuehē rō ndichí jíin jnúhun ñayīvi, ni tú cuehē rō cácu sēhe ñayuu cujéñu. ²⁷Chi sa suhva ni nacāji Yaā Dios tāca jéé cácahān ñayuu ñayīvi jéé tu ndichí cuiti, návāha coo jnúhun canu nuū tāca jéé ndichí. Te ni nacāji ya ñayuu tu téyí ini ñayīvi, návāha coo jnúhun

canu nuū ñayuu teyí. ²⁸Te suni ni nacāji Yaā Dios tāca jēē tu cújéhnū ini ñayívi, jíin tāca jēē sajéē ni i nuū, nde jíin tāca jēē tú jniñu cájeni ni i, návāha snúu ya tāca jēē cújéhnū ini ñayívi. ²⁹Súcuan ni sáha ya návāha ni ñin ñayuu ma cúu sátéyí i máá i nuū yā. ³⁰Te máá ró jijnáhan ró chi ni sáha Yaā Dios jeē nduú ró jíin Cristo Jesús. Chi nde nuū maá yá ni canihñ yō jñūhun ndíchí, te ni ndahva yā cuēchi yó, te ni sáha ya jeē iyó ndoo iyó íi yō nuū yā, chi ni jnama ya yohó. ³¹Te jeē yúcuan na cóo nájñūhun cáhán tutu ii: Núu ñin ñayuu cuní i cutéyí i, te na cutéyí i siquī jeē ni sáha máá Jítóho yō jehē i, áhí.

**Jeē nácani Pablo jñūhun
jeē ni jíhi Cristo**

2 Te ruhū, hermano, ná ni jeē rī nuū rō jijnáhan ró jēē nácani ndaā rī jñūhun Yaā Dios, te tu ní nácani rī jñūhun ndíchí jēē ma jécūhun ni rō. ²Chi ná ni ñyo rī jíin ró te tú na inga jñūhun ní ndúcú rī castūhun rī nuū rō, chi máni máá jñūhun Jesucristo jeē ni jíhi yā jicā cruz jeē jnáma ya yohó. ³Te ná ni jinū rī nuū rō jijnáhan ró, chi tú na fuerza rī, te yúhú rī, te quísi i ruhū. ⁴Te ná ni nacani rī jñūhun nuū rō, chi nasūu jíin jñūhun ndíchí ñáyuu ñayívi ní scándije rī rohó, chi sa suhva jíin máá poder Espíritu yā ni steén rī nuū rō jijnáhan ró, ⁵návāha ma cuñi ró síquī jñūhun ndíchí cácahān ñayuu, chi cuñi ró síquī poder Yaā Dios.

**Jíin Espíritu te stéén Yaā
Dios ndese Yaā cúu ya**

⁶Te ndaā chi ndíchí cácahān rī jíin ñáyuu jeē jé ni ije jíin jñūhun

cándije i ya. Te nasūu jñūhun ndíchí jēē iyó ini ñayívi yáha, ni nasūu jñūhun ndíchí cácahān tēe cájéhnū ñayívi yáha, chi tēe ún yáha-ni jeē cájéhnū de. ⁷Chi jñūhun cácahān rī cúu jñūhun ndíchí máá Yaā Dios jeē ní yisāhí. Chi jñūhun ndíchí un jēē ní yisāhí, ni jequin Yaā Dios nde ná tu jecōo ñayívi, návāha cácu yó jēē cótecu yō ní cáni sáha jñūhun ún. ⁸Chi ni ñin tēe cújéhnū nuū ñayívi yáha, tu ní jécūhun ni de jñūhun ndíchí un. Chi núu ni jecūhun ni de núu, te ma cáhni cuítí de máá Jítóho yō, Yaā cújéhnū luu. ⁹Chi cúu nájñūhun cáhán tutu:

Tāca jēē ni sátūhva Yaā Dios jeē cúu ñayuu jeē maní jíin yá, ni ñin ún tu ní jító jínúu ñayuu, ni tu ní jini sōho i, ni tu ní quíji jeē súcuan cani ni i.

Achí tutu. ¹⁰Te máá yó jijnáhan yó chi ni steén Yaā Dios tācá un núu yō jeē jíin Espíritu yā. Chi máá Espíritu jiní vāha ya te steén yā ndihí, chi nde ndihí jeē ndíchí gá máá Yaā Dios.

¹¹Chi ni ñin ñayuu ma cúu cuní i ndese jéni ni inga ñayuu, chi máá-ni i jíin ánuá i cúu jeē jiní. Te suni súcuan ni ñin ñayuu tu jíin i ndese jéni ni Yaā Dios, chi máá-ni Espíritu Yaā Dios cúu jeē jiní. ¹²Te máá yó chi ni nihñ yō Espíritu un jēē véji nuū Yaā Dios, te tu cájeni ni yō nájñūhun cájeni ni ñayuu ñayívi. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā. ¹³Te suu síquī tāca jēē yáha cúu jeē cácahān rī, te nasūu jíin jñūhun jeē castéén

ñayuu ndichí, chi jíin jnúhun jeē steén maá Espíritu. Chi cástéén rí jnúhun Espíritu nuū ñayuu cánevāha Espíritu.

¹⁴Te ñayuu ñayīví tu cájetáhú i tāca jnúhun jeē véji nuū Espíritu Yaā Dios, chi cájeni ni i jeē jnúhun cánée īi cúu. Te ma cúu jecūhun ni i, chi tu cánevāha i maá Espíritu jeē sāha jeē jécūhun ni i. ¹⁵Te ñayuu cánevāha Espíritu, chi cájecūhun ni i ndese íyó ndihi-ni. Te ñayuu ñayīví ma cúu jecūhun ni i ndese ñayuu cácuu ñayuu ún. ¹⁶Chi suhva cáhán tutu īi: ¿Ndé ĩin cuu cuni ndese jéni ni maá Jítóho yō? ¿Te ndé ĩin cuu stéén nuū yā? Ni ĩin ma cúu. Achí tutu. Te vēsú súcuau te maá yó chi cájeni ni yō nájñuhun jéni ni Cristo.

Jeē cáchindéé ñájñahan de cájejniñu de nuū Yaā Dios

3 Te ruhū, hermano, tu ní cúu cahān rí jíin ró jijnáhan ró nájñuhun cáhán rí jíin ñayuu jica jíin Espíritu. Chi ni cahān rí jíin ró nájñuhun jíin ñayuu cájica jíin modo maá, chi cácuu ró nájñuhun sūchi lúlí jéē ná tu ije ró jíin jnúhun Cristo. ²Ni steén rí nuū rō jeē tú yíí, chi cácuu ró nájñuhun sūchi lúlí jéē jéxin gā. Te tu ní cáhán rí jíin ró jnúhun yíí jeē cúu nájñuhun jeē ndáva jeē véji ñayuu ni ije, chi ná tu canda ró jíin ndé saá. Te ni vijna ná tu canda ró jíin. ³Chi cájica ga rō jíin modo neé maá ró. Chi cácuuésún ni rō, te cácajnáhan ró, te cácusĭin ni rō. Núu súcuau te cácuu ró nájñuhun ñayuu ñayīví jéē cájica jíin modo neé maá. ⁴Chi ĩin ró cáhán: Ruhū chi jíin Pablo índichi rí. Te ĩnga rō cahán: Ruhū

chi jíin Apolos. Te súcuau cúu jeē cájica ró jíin modo neé maá ró

⁵¿Te ndé ĩin cúu ruhū, te ndé ĩin cúu Apolos núu súcuau? Chi maá mozo-ni Yaā Dios cácuu ri, te ni jejniñu ya ruhū návāha candĭje ró maá Jítóho yō. Chi ná ĩin ná ĩin ri ni sāha jniñu ndese ni jēhe maá Jítóho yō nuū rí. ⁶Ruhū, nájñuhun ni taji ri jnúhun ya ini anuá rō, te Apolos, nájñuhun ni chuhun de ndute cúu jeē ní steén gā de nuū rō. Te maá Yaā Dios cúu jeē ni scuéhnú jnúhun ini anuá rō. ⁷Núu súcuau te tú na vé cúu sāha tēe táji ni tēe chūhun ndute, chi sa suhva maá Yaā Dios cúu jeē scuéhnú. ⁸Te tēe táji jíin tēe chūhun ndute, ĩin-ni cácuu de. Te tācá de chi cuāha ya yāhu nuū de ndese jniñu ni casāha ĩin ĩin de. ⁹Chi ruhū jijnáhan ri chi tēe chindéé ñájñahan cájejniñu nuū Yaā Dios cácuu ri. Te maá ró jijnáhan ró cácuu nájñuhun itu Yaā Dios jeē jícu ya jíin.

Te suni nájñuhun ĩin vehe jeē sāha Yaā Dios cácuu ró. ¹⁰Te ruhū chi cúu ri nájñuhun ĩin maestro albañil jeē ní jequin rí cimientó vehe ún, cúu jeē ni scándĭje ri rohó. Te ĩnga de cásama de siquī, cúu jeē castéén gā de nuū rō. Núu súcuau te ná ĩin ná ĩin de na cóo cuidado de ndese sáma de siquī. ¹¹Te Jesucristo cúu cimientó vehe ún, te ni ĩin ma cúu caquin ĩnga cimientó, chi maá yá cúu jeē ní ndahva cuēchi ró. ¹²Te tāca ñayuu cácañĭje, chi sāha i vehe siquī cimientó un, núu jíin ndajniñu vāha nájñuhun oro chí plata chí yūu luu, chí jíin jéē yachí naa, nájñuhun yujnu chí ite chí ndayóhō. ¹³Te

natū jniñu un jēē ní sáha iin iin i, te suu cúu ndese ni condihvī ni i siquī maá yá. Chi máá quivī juicio jeē sándaā yā jniñu ñayuu, quivī ún natū cájī jniñu i. Chi jíin ñuhūn quiiji quivī ún, te nájñuhun sáha ñuhūn jeē jéhmū tāca jēē cúu cayū, súcuan coto ndee ya jniñu iin iin i. ¹⁴Te núu tú cayū jniñu ní sáha i siquī cimientu un, te nihīn i tahū i. ¹⁵Te núu tu ní condihvī ni i jíin jniñu ya, te ma nihīn i tahū i, chi nájñuhun cayū jniñu i. Te máá i chi cācu ánuá i, vēsú nájñuhun je yajni cayū i nuū yáñuhūn.

¹⁶¿A tu cájini rō jeē cácuu rō nájñuhun templo Yaā Dios, chi ndéé Espírītu Yaā Dios ini anuá rō? ¹⁷Te núu iin tēe stfīvi de templo Yaā Dios, te snáhnū ndetū yā tēe ún. Chi ndoo ndasí cúu templo yā, te suu cácuu máá rō.

¹⁸Ni iin rō ma stahú rō maá rō jíin jēē jēni ni rō. Núu iin ñayuu jēni ni i jeē ndichí i jíin jnúhun ñayīvi yáha, vāha ga na siáā i ún, návāha coo ndichí ndije i jíin jnúhun máá yá. ¹⁹Chi jnúhun ndichí jēē iyó ini ñayīvi yáha, jnúhun cánéé íi cúu nuū Yaā Dios. Chi cáhán nuū tútu iī: Ñayuu ndichí cuenta ñayīvi, chi nájñi ya i siquī jnúhun ndichí i jeē jēsi i jnúhun ya, achí. ²⁰Te cáhán tucu tutu: Máá Jítoho yō jini yā tāca jēē jēni ni ñayuu ndichí, chi máni jeē jēni cāhá ni i, achí. ²¹Núu súcuan te ni iin rō má cutéyí rō jeē siquí ni iin tēe ndichí. Chi cuenta maá rō cúu ndihī-ni. ²²Cúu Pablo, cúu Apolos, cúu Pedro jeē castéén nuū rō. Cúu ndihī jeē iyó ini ñayīvi, jeē iyó vijnā jíin jēē quíji. Te vēsú núu cotecu rō

chí cuu rō, te ndihī-ni chi cuenta maá rō cúu. ²³Te máá rō cácuu cuenta Cristo, te Cristo cúu cuenta Yaā Dios.

Jeē casájniñu apóstol siquī jnúhun ya

4 Núu súcuan te na cáni ni rō jíinánhan rō jeē mozo-ni nuū Cristo cácuu ri, jeē ní tejniñu ya ruhū jeē steén rī jnúhun Yaā Dios jeē ní yisāhi ndé jenahán. ²Te ndaā chi tēe jeē sájniñu siquī ún, íyó responsable ná iin ná iin de jeē squícu vāha de. ³Te ruhū tu sáha ri cuenta núu cánanducú rō siquī rī ndese sáha ri, chí núu cánanducú ñayuu cácuujéhmū ini ñayīvi. Te ni máá rí tu chíhi ri cuenta siquī maá rí. ⁴Chi vēsú jini rī jíin ánuá rī jeē tú na cuēchi ri, te nasūu yúcuan cúu jeē quéndōo ndaā rī, chi máá Jítoho yō cúu jeē jíto ndee ruhū. ⁵Jeē yúcuan ma nánducú rō siquī jniñu jnáhan rō, chi nde na quēē maá quivī te cuni rō. Chi nde na ndiji máá Jítoho yō te nastúu ndijin yā tācá jniñu jeē yisāhi núu nēē, te stéén ndijin yā tāca jēē jēni ni ñayuu jíin ánuá i. Yūcuán na te máá Yaā Dios cuajnúhún yá ná iin ná iin i ndese ni casáha i.

⁶Hermano, tāca jnúhun yáha ní cahān rī návāha quendōo vāha rō jíinánhan rō. Te ni cachi rī jeē maá rí jíin Apolos cácuu ri mozo-ni nuū yā, te súcuan cácuu ri iin ejemplo nuū rō. Te cáhán rī jeē súcuan cácuu ri, návāha cutūhva rō cani ni rō maá-ni nájñuhun cáhán tutu iī. Chi ma sandúxí rō jeē cuajnúhún rō iin tēe steén, te inga de tuú. ⁷¿Te naun cácutéyí rō nuū jnáhan rō núu

súcuan? ¿Te na vé cúu jeē iyó núu rō jeē tu ní cacutahū rō nuū yā? Te núu ni cacutahū rō nuū yā, ¿te naun casátéyí ró maá ró jeē nájñuhun jeē nasūu jéē ní cacutahū rō cúu?

⁸Va je ni cacucúca ró, chi je cánevāha ró ndihi, cájeni ni rō. Te je cándacu maá ró jniñu, te ni tuá cájini ñúhún ró ruhū, cájeni ni rō. Tú vāha jeē súcuan cacutéyí ró. Te nacā jeē vāha núu jeē cándacu ndije nde ró jniñu núu, návāha suni cuāha ró jñuhun jeē ndacu nde ri jniñu jíin ró jijnáhan ri. ⁹Te íyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájñuhun tēe núu ga nuū ñáyuu, nájñuhun tēe jeē jé ni cundaā jeē cúu. Te níí ñáyivi jíin andiví cándēhe vāha nuū rī, cúu ndajéhé Yaā Dios jíin ñáyuu. ¹⁰Chi jeē siquí Cristo te cácahān i jeē tēe cánéé cácuu ri. Te tāca rōhó va ndíchí ró jíin jñuhun Cristo, cájeni ni rō. Te tāca rúhū chi tu fuerza rī, te rōhó va íyó fuerza rō, cájeni ni rō. Te rōhó chi cáhiyo yíñúhún ñáyuu nuū rō, te nuū rī chi casájéē ni i. ¹¹Níí véjicoo ri cájii rī sōco te nde vijna. Te cájichi rī ndute, te cúmani sahma ri, te tu casáha vāha ñayuu jíin rí, te ni tu cánevāha ri vehe. ¹²Te nihin casájniñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī. ¹³Cácahān neé i siquí rī, te sa cácahān manī ri jíin i. Te cácuu ri nájñuhun yācá ini ñayiví, te casquéhichī i ruhū nde vijna.

¹⁴Te nasūu jéē tēe ri yāha jéē cúcanu rō, chi sa suhva jeē stihví ni rī rōhó, chi cácuu ró nájñuhun sēhe ri chi manī rī jíin ró. ¹⁵Chi vēsú

na cóo uxī mil tēe stéén jñuhun Cristo nuū rō, te iin-ni tátá rō iyó. Te maá rí cúu nájñuhun tátá rō, chi ni scandije ri rōhó jéē ní nacani ri jñuhun vāha Cristo Jesús jeē jnáma ya yohó. ¹⁶Núu súcuan te cáhán ndahú rí jíin ró jeē na ndácu ró rúhū jijnáhan ró.

¹⁷Te jeē yúcuan cúu jeē tají rí Timoteo cuajeē de nuū rō. Chi cúu de nájñuhun sēhe ri jeē maní rī jíin de, te squícu vāha de nuū maá Jítóho yō. Te maá de nacachi tucu de nuū rō ndese jíca ri jeē candije ri Cristo, jíin ndese stéén rī nuū tāca grupo ñayuu cácañdije tāca lado. ¹⁸Te sava ró chi casátéyí ró maá ró, chi cájeni ni rō jeē ma jéé cuiti gā rī nuū rō. ¹⁹Te tuú chi yachi jeē rī nuū rō te núu súcuan cúní maá Jítóho yō. Yūcuán na te nanducú rí siquí tēe cacutéyí, te ma sáha ri cuenta jñuhun cácahān-ni de, chi sa coto ndee rī de núu cuu squícu nde de. ²⁰Chi jeē ndácu Yaā Dios jniñu nuū yō, nasūu maá jéē cahán iin-ni yó cúu, chi jíni ñúhún condiso poder jñuhun cáhán yō jíin jniñu sáha yó. ²¹Núu súcuan ¿te ndese cáculi rō? ¿A jéē cuxeēn rī nuū rō núu na jéé rī, siquí jeē tu cánacani ni rō, chí nacani ni rō te jeē rī jíin jñuhun cúndáhú ni jíin jñuhun vitá ni?

Jeē sándaā Pablo siquí iin cuēchi

5 Te ni nihin rī jñuhun jeē jíca jnéni iin tēe jeē íne mēhñu ró, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jñuhun Yaā Dios, tu casáha i súcuan. ²Te vēsú súcuan te casátéyí ró maá ró jijnáhan ró.

Vāha ga jeē na cúcuíhyá ndasí ni rō. Te cánuú jéē na quénehen ró téē sáha cuēchi ún na quénda de mēhñu ró. ³Te ruhū, vēsú tu íyó rí jíin ró, te nájñuhun jeē iyó rí jíin ró cúu jeē ñúhún ni rī rohó. Te je ni sándaā rī siquī téē ni sáha cuēchi ún, chí nájñuhun jeē iyó rí jíin ró cúu. ⁴Núu súcuan te na ndútútú ró jijnáhan ró, te máá Jítóho yō Jesucristo coo ya jíin ró. Te máá rí chí nájñuhun cone ri jíin ró, chí ñúhún ni rī rohó. Te poder maá Jítóho yō Jesús suni coo jíin ró. ⁵Te na chíhi yó téē ún ndaha Satanás, návaha na ndóho yiqui cúñu de, te nacani ni de te cācu ánuá de quivī ndiji Jitoho yō Jesús.

⁶Tuú vāha jeē casátéyí ró maá ró. ¿A tu cájini rō jñuhun cáhán suhva? Vēsú jecu-ni levadura te ndáa níí ñujen sáha, áchí. ⁷Núu súcuan te quenehen ró téē un nájñuhun scáne ró levadura jeē ni tívi. Te súcuan te cuu ró nájñuhun pan jeē cúvāha jíin ñujen jéé jéé tú na levadura yíhi, jeē cáyeji i vico pascua. Te ndaā jeē súcuan cácuu ró. Chí je ni jihí Cristo jeē ni sócō yā maá yá jehē yō, chí cúu ya nájñuhun londe pascua jeē ni jíhi. ⁸Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñuhun pan jeē tú na levadura yíhi. Te ma sáha yó jniñu néé jíin jniñu jnéhén, jeē cúu nájñuhun levadura jeē ni tívi.

⁹Nuū inga carta jeē ní tee ri nuū rō jijnáhan ró ni cahān rī jeē ma quívī nduu rō jíin ñáyuu cájica jnéni. ¹⁰Te tu ní cáchi rī jeē ma quíjnáhan cuiti rō jíin ñáyuu tu cácadíje jeē cájica jnéni, jeē ndíyo

ni, jeē sácuíhná, jeē chíñúhún ídolo. Chí núu súcuan te jíni ñúhún jeē quénda ró ini ñayívi núu, chí tuá na inga modo jeē cújiyo ró núu i chí ndéé yó ñayívi jíin i. ¹¹Chí sa suhva ni cachi rī jeē ma quívī nduu rō jíin máá ñáyuu jeē cácahān i jeē cúu i hermano, te núu jíca jnéni i, chí ndíyo ni i, chí chíñúhún i ídolo, chí chíso jñuhun i siquī jnáhan i, chí nájini i, chí cuíhná i. Te ni ma cájici cuiti rō staā jíin ñáyuu casáha súcuan. ¹²⁻¹³Chí nasūu jniñu ri cúu jeē sándaā rī siquī ñáyuu jeē tu cáhiin jíin yó. Yaā Dios cúu jeē sándaā siquī i. Te ñáyuu cáhiin jíin ró chí cánuú jéē sándaā rō siquī i. Núu súcuan te cánuú jéē quénehen ró téē ni sáha cuēchi un jéē íne de mēhñu ró, na quénda de.

Jeē ma cáquin i cuēchi siquī jnáhan i nuū tohó tu cácadíje

6 Te núu jnáhan ró jéē candíje ni sáha cuēchi siquī rō, ¿te naun jéngoo ró jíin de nuū tohó jeē tu cácadíje jíin yó? ¿Te naun tu cásaandaā rō nuū jnáhan ró cácadíje Yaā Dios? ²¿A tu cájini rō jeē ñáyuu cácadíje Yaā Dios chí ñin quivī te sándaā i jniñu ñáyuu ñayívi? Te núu ñin quivī sándaā rō jniñu ñáyuu ñayívi, ¿te á má cúu sándaā rō vijna siquī tāca cuēchi lúlí casáha jnáhan ró? ³¿A tu cájini rō jeē ñin quivī te sándaā yō nde jniñu tācá ndajéhé andiví? Te nagā ni cuu jniñu ñayívi yáha jeē ma cúu sándaā yō. ⁴Núu súcuan te núu jnáhan ró sáha de ñin cuēchi siquī rō, ¿te naun jéngoo ró sa nuū tāca téē jeē tu cúu de jnáhan ñáyuu cácadíje jeē sándaā de siquī cuēchi

ún? ⁵Súcuan cáhán rí návāha na cúcanu rō jijnáhan ró. ¿A tu íyó ni iin tēe jécūhun ni mēhñu ró jeē cuu sándaā de siquī rō? ⁶Tú vāha jeē iin hermano caquin cuēchi siquī inga hermano nuū tohó jeē tu cácanđije.

⁷Te jeē cájequin rō cuēchi siquī jnáhan ró, chi jeē castívi íi rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajniñu ró? ⁸Te tuú chi sa máá ró cásáha cuēchi te cáquende ró ndajniñu, te nuū tācá hermano rō cúu jeē casáha ró.

⁹⁻¹⁰¿A tu cájini rō jeē ñáyuu tu íyó ndáā, ma nihín tahú i quīvi i ñuu nuū ndácu Yaā Dios jniñu? Ma stahú ró maá ró cani ni rō jeē nihín tahú rō, chi ni ñayuu jeē jíca jnéni, ni ñayuu chiñúhún ídolo, ni ñayuu casíqui ndēe jnáhan, ni tēe sáha ndiyī jíin jnáhan yíi, ni ñayuu cuihná, ni ñayuu ndíyo ni, ni ñayuu nájini, ni ñayuu chisó jnúhun siquī jnáhan, ni ñayuu stahú jnáhan siquī xúhun, ma nihín tahú i quīvicoo i ñuu nuū ndácu Yaā Dios jniñu.

¹¹Te súcuan ni candāa sava ró núu, te vijna chi je ni nacate ya rohó, te cáhiyo ndoo cáhiyo íi rō nuū yā. Chi je ni ndahva yā cuēchi ró jēe jíin máá Jítoho yō Jesús jíin Espíritu Yaā Dios.

**Jeē iyó ndoo íyó íi yiqui
cúñu ñayuu cácanđije**

¹²Te ndaā cúu jeē cácahān jeē ndihi-ni jniñu íyó vāha sáha yó núu ndese cúní yō. Te vēsú súcuan te nasúu ndihi sáha jeē quéndōo vāha ánuá yō. Ndihi chí cuu sáha yó, te vēsú súcuan te tu íyó vāha jeē quívi yó núu jniñu jeē stívi ánuá

yō. ¹³Te ndaā cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te iin quivī te tuá coo súcuan, chí naa ndíndúu un sáha Yaā Dios. Te nasūu siquī jeē cáca jnéni yó cúu jeē iyó yiqui cúñu yō, chí sa suhva jeē sáha yó jēe cúní maá Jítoho yō. Te Jítoho yō chí ndíto ya yiqui cúñu yō. ¹⁴Te nájñuhun jeē ní nastécu Yaā Dios Jítoho yō, suni súcuan nastécu yā yohó jíin poder yā.

¹⁵¿A tu cájini rō jeē yíqui cúñu tācá iin iin ró cúu nájñuhun tāca parte yiqui cúñu Cristo? Núu súcuan ¿te á cuu quende yó iin parte yiqui cúñu Cristo te squíjnáhan yó jíin iin ñahan jíca jnéni? Ma cúu cuiti súcuan. ¹⁶¿A tu cájini rō jeē tēe quíjnáhan jíin ñahan jíca jnéni, iin na yiqui cúñu ni nduu de jíin ña? Chí cáhán tutu íi: Jeē ndíndúu chí iin na yiqui cúñu cuu, áchí. ¹⁷Te ñayuu jeē quíjnáhan jíin máá Jítoho yō, chí suni súcuan iin na cúu i jíin yá siquī jeē candíje i ya.

¹⁸Núu súcuan te cunu ró jēe ma quívi ró núu jnúhun jíca jnéni. Chí tāca gá cuēchi jeē sáha ñayuu, chí nasūu yiqui cúñu i stívi i. Te núu jíca jnéni i, te siquī yiqui cúñu i cúu jeē sáha i cuēchi. ¹⁹¿A tu cájini rō jeē yiqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá ró cácuu ró. ²⁰Chí Yaā Dios yahu ni cuu jeē ní nacuaan ya rohó jíjnáhan ró. Te jeē yúcuan cánuú jēe cáca yíñúhún ró nuū Yaā Dios jeē sáha ró jniñu vāha nde jíin yiqui cúñu rō jíin ini jíin ánuá rō, chí máni cuenta Yaā Dios cúu.

Jñuhun cástūhun síquī tēe jín nāsihí

7 Vijnā te na cáchi rī síquī tāca jñuhun jeē ní cacajñuhun ró ruhū nuū carta. Jendaá jeē vāha ga quendōo ñn tēe núu tú condeca de ñahan. ²Te síquī jeē iyó jñuhun jnéni, te vāha ga jeē tāca tēe na cóo ñāsihí máá de, te suni tācā ñahan coo yīi máá ña. ³Te yīi na squícu vāha de nuū ñāsihí de jeē cúu de yīi ña. Te suni súcuan ñāsihí na squícu vāha ña nuū yīi ña. ⁴Chi ñāsihí chi tu cúu sáha ña jeē cuní ña jín yiqui cúñu ña, chi suni jeē cuní yīi ña. Te suni súcuan yīi tu cúu sáha de jeē cuní de jín yiqui cúñu de, chi suni jeē cuní ñāsihí de. ⁵Te ma sasáhán ró maá ró nuū jnāhan ró. Te núu cácuñi rō jeē vihyá gā cacān tahu rō jecu tiempo, te núu cáhiyo conforme ndindúú ró, te cuu sásáhán ró maá ró nuū jnāhan ró. Te yūcuán na te vāha ga naquijnāhan tucu ró, návāha ma cóto ndee Satanás rohó síquī jñuhun jnéni.

⁶Te nasūu jēe ndácu ri jniñu jeē cánuú quijnāhan ró, chi jeē jéhe rī jñuhun cúu. ⁷Chi núnjahan ni rī jeē tāca tēe na cóo máá ñn-ni de, nájñuhun iyó máá rí. Te sñin sñin ni sáha Yaā Dios jín ñn ñn de ndese cúu máá de, chi sava de cuu quendōo máá ñn-ni de, te inga de chi tuú chi sñin ni sáha ya jín de.

⁸Núu súcuan te cáhán rī jín ñáyuu cáhiyo máá ñn-ni, jín ñahan ní caquendōo ndáhú, jeē vāha ga te núu quendōo máá ñn-ni i, nájñuhun iyó máá rí. ⁹Te núu jíní i jeē ma cánda i quendōo máá ñn-ni i, te na quijnāhan i núu súcuan. Chi vāha

ga jeē quijnāhan i vēsú jeē ndúquiji i.

¹⁰Te nuū ñáyuu jeē jé ni quijnāhan chi ndácu ri jniñu jeē ñahan ma ndusñin ña jín yīi ña. Te nasūu rúhú cúu jeē ndácu jniñu, chi máá Jítóho yō. ¹¹Te núu ñn ñahan ndusñin ña jín yīi ña, te na quéndōo máá ñn-ni ña, chí cuu naquijnāhan ña jín yīi ña. Te yīi suni ma ndusñin de jín ñāsihí de.

¹²Te jín sava ga ñayuu chi cahān rī yāha jēe jéni ni maá rí, te nasūu jēe ní cachi máá Jítóho yō cúu. Núu ñn hermano ndéca de ñahan jeē tu cándíje, te núu núnjahan ni ña condee ña jín de, te ma ndusñin de jín ña. ¹³Te núu ñn ñahan ndéca ña tēe jeē tu cándíje, te núu núnjahan ni de condee de jín ña, te ma ndusñin ña jín de. ¹⁴Chi tēe tu cándíje, yñhi cuenta de nuū Yaā Dios síquī jeē ní quijnāhan de jín ñahan cándíje. Te ñahan tu cándíje, yñhi cuenta ña nuū Yaā Dios síquī jeē ní quijnāhan ña jín tēe cúu hermano cándíje. Chi núu tu súcuan te sēhe i ma quñhi cuenta i nuū Yaā Dios, te vijnā chi yñhi cuenta i nuū yā. ¹⁵Te yīi chí ñāsihí tu cándíje, núu fuerza cuní i ndusñin i jín jnāhan i, te na ndúsñin i. Chi núu súcuan cuní i, te hermano chí hermana cándíje tu cánuú casi i jeē ndusñin jnāhan i jeē tu cándíje. Chi ni cana Yaā Dios yohó jēe condee maní yō jín jnāhan yō. ¹⁶Te rōhó jēe cácuu ñāsihí, tu cájini rō, sanaa te cándíje yīi ró sáha ró, te cācu de. Te suni súcuan rōhó jēe cácuu yīi, tu cájini rō, sanaa te cándíje ñāsihí ró sáha ró, te cācu ña.

¹⁷Te ná iin ná iin ró na quéndōo ró ndese ni sáha Jitoho yō jeē cúu ró, jín ndese íyó ró ná ni cana ya rohó ní candíje ró. Te súcuan ndácu ri nuū tāca grupo ñayuu cácadíje. ¹⁸Núu ni cana ya iin tēe jeē ní cuu circuncidar, te súcuan na quéndōo de. Núu ni cana ya iin tēe jeē tu ní cúu circuncidar, te ma cúu de circuncidar. ¹⁹Chi tú na vé sáha núu cúu yó circuncidar chí tuú, chi jeē cánuú gá cúu jeē na squícu vāha yó jniñu cúní Yaā Dios. ²⁰Ná iin ná iin ró na quéndōo ró ndese íyó ró ná ni cana ya rohó ní candíje ró. ²¹Núu mozo jeē ní jeen ñayuu cúu ró ná ni cana ya rohó, te ma cóndihví ni rō jeē quéndá ró. Te núu íyó modo jeē quéndá ró nduu libre rō, te íyó váha jeē sáha ró. ²²Chi tēe cúu mozo jeē ní jeen ñayuu, te núu ni cana Jitoho yō de, te vijna chi ni nduu libre de nuū cuéchi de, jéjníñu de nuū maá Jítoho yō. Te suni súcuan tēe sájniñu cuenta maá, te núu ni cana ya de, te vijna chi ni nduu de mozo jejníñu nuū Cristo jeē ní nacuaan ya de. ²³Chi yahu ni cuu jeē ní nacuaan Yaā Dios rohó jijnáhan ró, cúu jeē ni jíhi Sēhe ya jehē rō. Núu súcuan te ma cuajníñu ró núu jniñu cāhá-ni jeē ndácu ñayuu ñayíví. ²⁴Núu súcuan hermano, ná iin ná iin ró na quéndōo ró núu Yaā Dios ndese íyó ró ná ni cana ya rohó. ²⁵Te vijna te siquí ñayuu jeē íyó máá-ni, tú na jñuhun ní ndácu Jitoho yō nuū rí. Te na cáhan rí jeē jéni ni maá rí, chi ni cundáhu ni Jitoho yō ruhū, te ni sáha ya jeē cúu cahān ndaā rí. ²⁶Jéni ni rí jeē váha-ni núu quendōo-ni tēe

ndese cáhiyo de, jeē siquí jeē íyó jñundóho tiempo yáha. ²⁷Núu íyó ñasihí ró, te ma ndusín ró jín ña. Te núu tu íyó ñasihí ró, te ma nducú ró ña. ²⁸Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chi nihin i jñundóho ñayívi yáha, te cúní rí jeē ma nihin rō jñundóho.

²⁹Hermano jijnáhan ró, jñuhun jeē cahán rí yáha cúu jeē yachi-ni ndihi tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihví gā ni de siquí jniñu máá yá vésú siquí ña. ³⁰Te ñayuu jeē ni jíhi jnáhan vehe i, na sáha i nájñuhun jeē tu cúcuíhyá ni i. Te ñayuu cúsiñ ni, na sáha i nájñuhun jeē tu cúsiñ ni i. Te ñayuu jéen, na sáha i nájñuhun jeē nasūú ndajniñu i cúu. Ma cuáha i jñuhun jeē cási tācá un jéē ma cúu condihví ni i jniñu máá yá. ³¹Te ñayuu jeē ní cacondihví ni siquí ndajniñu ñayívi yáha, ma cujnéñu ga i jín. Chi je yajni naa tāca jéē íyó ñayívi yáha.

³²Cúní rí jeē ma nácani ndasí ni rō siquí tāca jéē íyó ini ñayíví. Chi tēe cúu soltero, ndíhví ni de jniñu máá Jítoho yō, ndese cusí ni Jitoho yō sáha de. ³³Te tēe íyó ñasihí chi ndíhví ni de jniñu íyó ñayíví, ndese cusí ni ñasihí de sáha de. ³⁴Te suni súcuan síñ síñ jéni ni ñahan íyó yí jín ñahan íyó máá. Chi ñahan íyó máá, ndíhví ni ña jniñu máá Jítoho yō, chi cúní ña jeē coo ndoo coo i anuá ña jín yiquí cúñu ña cuajniñu ña nuū yā. Te ñahan íyó yí chi ndíhví ni ña jniñu íyó ñayíví, ndese cusí ni yí ña sáha ña.

³⁵Jeē váha máá ró jijnáhan ró cúu jeē ni cáhan rí súcuan. Chi nasūu

jeē nducú rí casi rī jeē quijnáhan ró, chi sa suhva cúni rī jeē caca yíñúhún ró te nune ró cuajníñu cutú ró núu maá Jítóho yō.

³⁶Te núu iin tēe íyó sēhe síhí de, te núu cuayíi i, te núu jéni ni de jeē vāha ga jeē quijnáhan i, núu súcuan te na sáha de jeē jéni ni de, te cuāha de jnūhun quijnáhan i, chi nasūu cuéchi cúu. ³⁷Te núu iin tēe ni cundaā ni de jeē cóndee sēhe síhí de súcuan-ni, jeē ma cuāha de i vēsú fuerza jícán ñayuu i, núu súcuan te cuu quendōo i nájñūhun cúni de, chi jeē vāha sáha de.

³⁸Núu súcuan te tēe jéhe jnūhun quijnáhan i, vāha sáha de. Te tēe tu jehe jnūhun, chi vāha ga sáha de.

³⁹Te ñahan ní quijnáhan, chi yíhi ña ndaha yíi ña níni jeē técu de. Te núu je ni jihí yíi ña, yūcuán na te je ni cuu libre ña jeē quijnáhan tucu ña jíin na-ni tēe cúu ni ña, te núu tēe cándíje nuū Jítóho yō cúu de. ⁴⁰Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jíin Espiritu Yaā Dios cúu jeē cahán rī.

Siquí cūñu ni sócō nuū ídolo

8 Te vijna te na cáchi rī siquí cūñu ni sócō nuū ídolo. Ndaā chi tāca yó jéni ni yō jeē maá yó cúu jeē jiní ndese cúu. Te tāca jéē jiní yō ún, chi nducú sáha jeē cundúxí yó. Te sa suhva jeē cundáhú ni yō jnáhan yó, sáha un jéē íje i jíin jnúhun ya. ²Núu na-ni ñayuu jéni ni i jeē jiní vāha i, te tuú chi ná tu cuni cuiti i nájñūhun cánuú cuni i. ³Te sa suhva ñayuu jeē maní i jíin Yaā Dios, maá i cúu jeē jetáhú yá.

⁴Núu súcuan te na cástūhun rí siquí cūñu jeē ní casocō ñayuu nuū ídolo. Ndaā chi jíin yō jeē tāca ídolo ñayiví, tú ndaā cuiti. Te tú na inga yaā iyó, chi maá iin-ni Yaā Dios.

⁵Te ñayuu chi cájeni ni i jeē iyó tāca yāā ini andiví jíin ñáyiví, chi cácahān i jeē iyó ndije cuehē yaā i jíin jítóho i. ⁶Te nuū maá yó chi iin-ni Yaā iyó, jeē cúu Tátá yō Yaā Dios. Te maá yá ni sáha tāca jéē iyó, te cuenta maá yá cúu yó jíináhan yó. Te suni íyó iin-ni Jítóho yō Jesucristo, te nde nuū maá yá vēji tāca jéē iyó, te suni maá yá ni sáha yóhó.

⁷Te ñayuu cácaandíje, chi tú ndihi i jíin jnūhun yáha. Chi sava i ni cacāan i ni chiñúhún i ídolo nde ná tu candíje i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquí jeē ná tu íje i jíin jnúhun Yaā Dios, te jéni ni i jeē cujnéhén ánuá i sáha cūñu jeē ni sócō nuū ídolo ún. ⁸Te ndaā chi nasūu jéē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo vāha ga yō nuū Yaā Dios. Te núu tu yéji yō, ni tu sáha jeē quéndōo ndáhú gá yō nuū yā.

⁹Te vēsú tú ni iin jési jeē ma cúu caji rō cūñu ún, te coto ró jnáhan ró jéē ná tu íje jíin jnúhun ya, te ma sáha ró jéē suni caji i jeē jéni ni i jeē cuéchi cúu. ¹⁰Vāha ga ma caji rō núu súcuan, chi sanaa te hermano rō jeē ná tu íje jíin jnúhun ya, coto de róhó jéē yéji rō ini vehe ídolo, chi jíin vāha ró jéē tú na vé sáha. Te súcuan te sáha ró jéē cájni ni de jeē suni caji maá de cūñu jeē ni sócō nuū ídolo, vēsú jéni ni de

jeē cuēchi cúu. ¹¹Te súcuan stívi ró anuá hermano rō jeē ná tu ije jíin jnúhun ya, vēsú jíiní vāha máá ró jeē tú na vé sáha jeē cáji rō. Te tú vāha sáha ró, chí suni jehē maá de ni jihī Cristo. ¹²Te núu súcuan stívi ró anuá hermano rō jeē ná tu ije jíin jnúhun ya, núu súcuan te siquī Cristo cúu jeē sáha ró cuēchi. ¹³Núu súcuan te núu cūñu un sáha jeē quívi hermano rī cuēchi, te ma cáji cuíti ga rī cūñu ún, návāha ma sáha ri jeē quívi de cuēchi.

**Siquī jeē iyó derecho
tēe cácuu apóstol**

9 Te máá rí chí jíca libre rī, te iyó derecho rī siquī jeē cúu rī apóstol, tēe ni tají yá scáca jnúhun ya. Chí ni jito ri nuū máá Jítóho yō Jesús, te máá ró jijnáhan ró cácuu jniñu jeē ni sáha ri jeē ni squívi ri rohó ndaha Jítóho yō. ²Te núu sava ga ñayuu tu jétáhú i jeē cúu rī apóstol, te nuū máá ró chí suu cúu ndije ri. Chí siquī jeē ní scandíje ri rohó jijnáhan ró, te jeē yúcuan cácuu ró prueba jeē steén jeē ndíso jniñu ri cúu ri apóstol nuū máá Jítóho yō.

³Te jnúhun yáha cáhán rī jehē máá rí nuū ñayuu cácahān siquī rī. ⁴Achí rí: Iyó derecho rī caji rī coho ri jeē cájēhe ñayuu núu cúní rī. ⁵Te suni iyó derecho rī núu jeē cuní rī condeca ri iin hermana candíje cuu ñasihí rí, caca ña jíin rí, nájnúhun iyó ñasihí Pedro jíin táca gá apóstol jíin tēe cácuu ñani máá Jítóho yō. ⁶¿Chí cájeni ni rō jeē máá rúhú-ni jíin Bernabé tú na derecho rī jeē stóo ri jniñu cásáha ri jeē cótecu rī, návāha nune ga rī nacani ri jnúhun

vāha ya, chí naún? ⁷¿A iyó soldado jeē técu de xúhún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndíto lanchi te tu jíhi de leche tí? Tú cuíti. ¿Te á suni tu iyó derecho rī cotecu rī siquī jnúhun ya naún? ⁸Te ma cáni ni rō jeē táca jēe cáhán rī yāhá, máni máá jēe cácahān ñayuu ñayívi cúu. Chí nde maá ley yā jeē ni jēhe ya nuū Moisés, cáhán súcuan. ⁹Chí cáhán nuū tútu ley yā: Ma chúhun ró ñunu yuhu stíquī, quíti jéxín trigo, achí. Te ndaā chí nasūu máni siquī stíquī cúu jeē ni cáhán yā súcuan. ¹⁰Chí suni siquī máá yó ní cáhán yā. Chí ley un ní jēhe ya jeē vāha máá yó, chí steén jeē tēe jítu jíin tēe jéxín trigo cánuu jeē nihín de sava un quívī ndutútú. ¹¹Te suni súcuan ruhū jijnáhan ri jeē ní cataji ri jnúhun Espíritu ini anuá rō, ¿te á véyi cúu jíin ró núu nastútú rí jeē cótecu rī nuū rō? ¹²Te núu sava ga tēe cástéén nuū rō, iyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chí sa suhva ni jendeyí ni rī coto máá rí jeē cáji rī, návāha ma cási rī jeē cáca jnúhun vāha Cristo. ¹³Te cájini rō jeē sutū ni cajejniñu ini templo, ni cacotecu de siquī jeē ní casocō ñayuu ini templo. Chí sutū ni cajejniñu nuū altar nuū ní casocō i quíti, suni ni cayeji de sava quíti ún. ¹⁴Te suni súcuan ni ndacu máá Jítóho yō jniñu jeē tēe cánacani jnúhun jeē jnáma ya yohó, siquī jniñu un níhín de jeē cótecu de. ¹⁵Te ruhū tu ní jíicán cuíti rī derecho rī yāhá, te suni nasūu jēe

tée ri jnūhun yáha návāha cuāha ró núu ri jijnáhan ró. Chi jéni ni rī jeē vāha ga núu na cúu rī nasūu jéē quíhin ri jeē cuāha ró, chi casi jeē cúsihī ni rī scāca ri jnūhun ya súcuan-ni.

¹⁶Te tú vāha núu sátéyí rí maá rí siquī jeē nácani ri jnūhun jeē jnáma ya yohó. Chi iin jeē ní tejniñu ya ruhū cúu, te cánuú squícu ri. Chi nacā ndahú cúu ri te núu tú nacani ri jnūhun ya. ¹⁷Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chi cánuú sáha ri, chi máá Yaā Dios ni tee ya jniñu siquī rī. ¹⁸Núu súcuan te yāhu ri cúu jeē cúsihī ni rī jeē súcuan-ni nácani ri jnūhun jeē jnáma ya yohó, te tu jícan rī derecho rī jeē cotecu rī siquī jeē nácani ri jnūhun ya.

¹⁹Chi vēsú tú ni iin ñayuu ndácu jniñu nuū rī, te ni sáha ri maá rí mozo nuū tācá i jeē nácani ri jnūhun nuū i, návāha nihīn rī cuehē i candíje i Cristo. ²⁰Núu íne ri jíin jnáhan ri hebreo te sáha ri nájñūhun cásáha i, návāha cuu scándíje ri i. Chi násáha ri maá rí nájñūhun tēe cáyihī chiji ley Moisés, návāha cuu scándíje ri i jeē cáyihī i chiji ley un, vēsú tuá yíhi ri chiji ley un. ²¹Te suni násáha ri maá rí nájñūhun ñayuu tu cáyihī chiji ley Moisés, návāha cuu scándíje ri ñayuu ún. Te vēsú súcuan te yíhi ri chiji ley Yaā Dios, chi suu cúu ley Cristo jeē squícu ri. ²²Te núu íne ri jíin ñáyuu jeē ná tu ije jíin jnúhun ya, te sáha ri maá rí nájñūhun jeē ná tu ije ri jíin jnúhun ya, návāha cuu scándíje ga rī i. Núu súcuan te násáha ri maá rí núu ndese cándāa

tāca ñáyuu, návāha tācá-ni modo un te cuu scándíje ri sava i. ²³Tāca yáha sáha ri jeē siquī jnúhun jeē jnáma ya yohó, návāha suni nihīn rī tahū jeē ndíso jnūhun ya.

²⁴Je cájini rō jeē tēe cájinu carrera, jendaá chi ndíhi de cájину, te iin-ni de cúndeyí nihīn premio. Te suni súcuan nducú ndéyí máá ró squícu ró, návāha nihīn rō premio nuū yā. ²⁵Te tāca tēe cúni cundeyí síquī iin deporte, chi cáscuáha de te cándito de máá de. Súcuan cásáha de návāha nihīn de iin premio jeē cúu corona ndaha yújnu jeē náā yachī. Te máá yó chi sa suhva cánducú ndéyí yó návāha nihīn yō iin premio jeē ma náā cuíti. ²⁶Te máá rí suni nducú ndéyí rí nájñūhun tēe cájину, te tu nducú ndéyí cāha rí. Te sáha ri nájñūhun tēe cácajnáhan juego jeē tu jéhe iyú de, chi queé jniñu sáha ri. ²⁷Chi sa suhva stóho ri yiquí cúñu rī, te stíhvī ni rī maá rí squícu ri. Chi vēsú ni stíhvī ni rī ínga ñayuu jeē nducú ndéyí i, te núu tu nducú ndéyí máá rí te snāā rī premio rī.

Siquī jeē ma chíñúhún i ídolo

10 Hermano jijnáhan ró, cúni rī jeē na jécūhun ni rō ndese ni cajica jíy yō jenahán. Chi ndíhi de ni cajica chiji vicō jeē ni stéén ichi nuū de, te ndíhi de ni cayāha mēhñú ndute Mar Rojo jeē ní cusíin, ni nune ichi. ²Súcuan cúu jeē ní canduu inuú ndíhi i jíin Moisés, chi ni candiquīn i de chiji vicō jíin méhñu mar. ³Te ndíhi i chi inuú-ni ni cayeji i alimento jeē ni jéhe máá Espíritu. ⁴Te suni ndíhi i ni cajihī ndute jeē ni jéhe Espíritu.

Chi ni cajihī i ndute jeē ní cane jicā cáva nuū ní cajica cuu i. Te Cristo cúu nájñuhun cava un jéē jéhe ya ndute cotecu yō níf cáni. ⁵Te vēsú súcuan te cuehē i ni cunihni ni i, te tu ní cúsihī ni Yaā Dios jíin i, te jeē yúcuau ní cajihī i nuū ñuhun téhé.

⁶Te tāca jéē ní cuu ún, iin ejemplo cúu nuū yō, návāha ma ndíyo ni yō tāca jéē neé, nájñuhun ni candiyo ni ñayuu ún. ⁷Te ma chiñúhún ró ídolo, nájñuhun ni casáha sava i. Chi súcuan cáhán nuū tútu ii: Ni cacucōo ñayuu ún, ni cayeji i ni cajihī i vico ídolo, te ni ndocuññī i ni cajita jéhé i, áchí. ⁸Te ni ma cáca jnéni ró nájñuhun ni casáha sava i, te ni cajihī ocō unī mil i jeē iin quivī-ni. ⁹Te ni ma sáha ró jniñu jeē squití ni rō Jitoho yō, nájñuhun ni casáha sava i, te ni cajihī i jeē ní catuu coō i, ni sáha ya. ¹⁰Te ni ma cahán sōo ró siquī Yaā Dios, nájñuhun ni cacahān sōo sava i, te ni cajihī i jeē ní jehni ndajéhé yā i.

¹¹Te tāca jéē ní cuu ún, chi iin ejemplo cúu nuū yō. Te súcuan yósó núu tútu návāha na chúhun vāha ni maá yó. Chi cácuu yó ñayuu cátecu quivī cuándihī ñayiví. ¹²Núu súcuan te rōhó jéē cájeni ni rō jeē cáhiin nihin ró jéē ma sáha ró cuéchi, coto má quiví ró cuéchi. ¹³Chi máni íyó jéē nducú squiví rōhó cuéchi, te inuú-ni cándoho ró súcuan nde jíin táca gá ñayuu. Te cuu cucáhu ni rō Yaā Dios jeē ma cuáha ya jñuhun jeē vihyá gá coto ndee jexeén rōhó vēsú jeē cúu cundeyí ró jíin. Chi sa suhva núu vēji jeē nducú squiví rōhó cuéchi, te chindéé ñáhán yá rohó quenda ró te cundeyí ró siquī.

¹⁴Ñánī mánī, ma chiñúhún cuiti rō ídolo núu súcuan. ¹⁵Cáhán rī jíin ró jéē cúu ró ñayuu cájecūhun ni, te na sáha ró cuenta núu ndaā jñuhun cáhán rī. ¹⁶Maá copa ii jeē cájicān tahu yō jehē, suu cájihī cáhu yó jéē steén yō jeē inuú cúu ndihī yó, chi ni jeti ññī Cristo jeē siquí yō ná ni jihī yā jicā cruz. Te pan jeē sacuéchí yó cáyeji cáhu yó, stéén jeē inuú cúu ndihī yó siquī jeē ni jéhe Cristo yiqui cúñu yā ni jihī yā jehē yō. ¹⁷Te vēsú cuehē yō iyó, te iin-ni ñayuu cácuu yó, chi iin-ni pan un cáyeji cáhu yó siquī jeē cácanjíe yó.

¹⁸Condēhe ró ndese casáha ñayuu Israel. Tāca tée jeē yéji quitī jeē ni sócō nuū yā, chi inuú-ni cúu ndihī de siquī jeē cáyeji de jeē ni sócō ún. ¹⁹Núu súcuan te cáhán rī jeē tu ndé jéjníñu ídolo, ni tu jéjníñu cūñu jeē ni sócō nuū ídolo, chi inuú cúu jíin táca gá cūñu. ²⁰Te suni cáhán rī jeē ñayuu tu cájini jñuhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajniñu ró núu tachī. ²¹Ma cúu coho ró copa maá Jitoho yō te núu cájihī ró jéē ni sócō nuū tachī. Te ma cúu caji rō nuū mesa Jitoho yō te núu cáyeji rō jeē ni sócō nuū tachī. ²²Ma quiví nduu yō súcuan jíin táchī, návāha ma cucuññī Jitoho yō jíin yó. ¿Chí téyí gá maá yó vēsú maá yā jeē ma cúu stóho ya yohó, cájeni ni rō, chí naún?

Ndihī chi sáha yó jíin jñuhun cundáhú ni

²³Te ndaā cúu jeē cácahān jeē ndihī-ni jniñu íyó váha sáha yó núu ndese cúní yō. Te tuú chi nasúu ndihī sáha jeē quéndōo vāha ánuá

yō. Ndihi chi cuu sáha yó, te vēsú súcuan te nasūú ndihi sáha jeē ije jnáhan yó jíin jnúhun ya. ²⁴Chi cánuú sáha yó jéē váha jnáhan yó, nasūu máni máá jéē váha máá yó.

²⁵Cuu caji rō ndihi-ni cūñu cūyáhu nuū yáhu, te ma cájñuhun rō ni ma cáni ni rō núu jeē ni sócō nuū ídolo cúu. ²⁶Chi cuenta maá Jítóho yō cúu ñayīvi jíin ndivii jeē iyó ini, te cuu cuajníñu yó.

²⁷Te núu iin tēe tu cándíje, cana de rōhó caji rō jíin de, te núu cácuni rō quihīn rō, núu súcuan te caji rō tāca jéē cáni de nuū rō. Te ma cájñuhun rō ni ma cáni ni rō núu jeē ni sócō nuū ídolo cúu. ²⁸Te núu cachi iin i nuū rō jeē cūñu ni sócō nuū ídolo cúu, yūcuán na te ma caji rō, chi siquī jeē jéni ni i jeē cuēchi cúu, te tu cúní rō sáha rō jéē quívi i cuēchi. ²⁹Te súcuan cáhán rī siquī jeē inga i cājeni ni i jeē cuēchi cúu, te nasūu jéē súcuan cājeni ni maá rō.

Te sanaa te cahān iin rō: ¿A tu íyó libre rī caji rī jeē cuní maá rī, vēsú cājeni ni inga i jeē cuēchi cúu? ³⁰¿Te núu nácuatáhú rī nuū Yaā Dios te yéji rī, te najehē cácahān i siquī rī jeē yéji rī? achi rō. ³¹Tuú chi ndihi jeē sáha rō, vēsú jeē caji rō chí jéē coho rō, chí na-ni jniñu sáha rō, ndihi na sáha yíñúhún rō jíin Yaā Dios, návāha cuni ñayuu jeē luu cújéhnu ya. ³²Te ma sáha rō jniñu jeē squívi rō ñáyuu nuū cuéchi, cúu ñayuu hebreo, cúu ñayuu tācá nación jeē tu jíin jnúhun ya, cúu ñayuu cácañíje Yaā Dios. ³³Te ruhū chí ndúcú rí jeē na cúsiñi ni tāca ñáyuu jíin táca jniñu sáha ri. Tu ndúcú rí jeē váha máá-ni

ri, chi sa ndúcú rí sáha ri jeē váha cuehē ñayuu, návāha cācu i.

Siquī ndese cánuú sáha ñahan cándutútú

11 Te na ndácu rō rúhū jijnáhan rō, nájnūhun ndácu máá rí Cristo. ²Váha cásáha rō, hermano, jeē niní cánucūhun ni rō ruhū, te cándihvī ni rō jíin táca jniñu jeē ni steén rī nuū rō. ³Te cúní rī jeē na jécūhun ni rō jeē Cristo cúnuú yá nuū tāca tée. Te tēe cúnuú de nuū ñasihí de. Te Yaā Dios cúnuú yá nuū Cristo. ⁴Núu iin tēe ñúhun de lélú te jícán tahú de chí nácani de jnúhun nuū ndutútú ñáyuu cácañíje, núu súcuan te jéhe de jnúhun canu máá de. ⁵Te sa núu iin ñahan tu ndési xinī ña te jícán tahú ña chí nácani ña jnúhun, núu súcuan te jéhe ña jnúhun canu máá ña, chi iin-ni cúu un núu ní sáte xinī ña. ⁶Chi núu tú casi ña xinī ña, vāha ga na sáte ña ixi ña núu súcuan. Te núu cúcanu ña jeē sáte ña ixi ña chí jéē sáte lii ña, te na cási ña núu súcuan. ⁷Te tēe chi ma cási de xinī de, chi máá de cúu muestra jeē steén ndese cúu Yaā Dios jeē cújéhnu ya. Te ñahan chi stéén ña jeē cújéhnu tēe. ⁸Chi ná ni sáha ya tēe, te nasūu jíin yiqui ñahan ni sáha ya, chi sa suhva jíin yiqui tée ni sáha ya ñahan. ⁹Te ñahan chi ni cuvāha ña jeē siquí tée, nasūu tée jeē siquí ñahan. ¹⁰Te jeē yúcuan cánuú jéē cóndesi xinī ñahan, te suu stéén jeē cújéhnu tēe, chi suni cándehē ndajéhé yā ndese sáha ña. ¹¹Te vēsú súcuan te yóhó jéē cándíje yó, chí jíin yō jeē tu íyó tée núu jeē tu íyó ñahan, te tu íyó

ñahan núu jeē tu íyó tée. ¹²Chi vēsú ni sáha ya ñahan jíin yiqui tée, te vijna cácu tée chíjī ñahan, te máá Yaā Dios cúu jeē sáha tācá-ni.

¹³Na sáha máá ró cuenta zá íyó váha núu tu ndési xinī ñahan te jícan tahuñ ña nuū Yaā Dios? ¹⁴Chi sáha yó cuenta jeē ini ñayīvi yáha, núu cáni ixi tēe te cúcanu de sáha. ¹⁵Te ñahan chí sa váha jíto ña te núu cáni ixi ña, chí suu ni jēhe ya jeē cóndesi xinī ña. ¹⁶Te núu ndé iin ñayuu cuní i cahān i siquī jñuhun yáha, te ruhū jíin táca grupo ñayuu cácañdije nuū Yaā Dios, tú na inga costumbre jejnúhún rí siquī jñuhun yáha.

Jeē castívi i siquī Cena Jitoho yō

¹⁷Te íyó inga jñuhun cánuu cahān rí jíin ró, chí tu cúu cahān rí jeē váha casáha ró. Chí nuū cándutútú ró te tu sáha jeē quéndōo váha ga rō, chí sa jeē castívi ró. ¹⁸Xihna jñuhun yáha cáhān rí, jeē nihín rí jñuhun jeē nuū cándutútú ró te cácusín ni rō. Te jéni ni rí jeē ndaā cúu. ¹⁹Chi níni coo sava ró jēe cusín ni, návāha natūu ndé-ni cúu jeē cácañdije váha mēñu ró. ²⁰Te jeē cácusín ró súcuan nuū cándutútú ró, te nasūu cena maá Jitoho yō cúu jeē cáyeji rō núu súcuan. ²¹Chí núu cáyeji rō, te tācá iin iin ró cúní caji xihna gā vēsú jnáhan ró. Te súcuan te sava ró tu cánihin, te cájii sōco, te sava ró cánajini jeē cájilhi cuehē. ²²¿A tu cánevāha ró vehe nuū cáji rō coho ró, chí naún? Chí jeē casáha ró súcuan cúu jeē tu íyó yñíuhún ró ini vehe nuū cándutútú ñayuu cácañdije Yaā Dios, chí casáha ró

jeē cácucañu ñayuu jeē tú na vé névāha. ¿Ndeese cahān rí jíin ró núu súcuan? ¿A cáhān rí jeē váha casáha ró? Tuú chí nasūu jēe váha cúu jeē casáha ró súcuan.

Siquī jeē ní jequin Jitoho yō Cena yā

(Mt. 26.26-29; Mr. 14.22-25; Lc. 22.14-20)

²³Chí jñuhun yáha jēe ní nastéén rí nuū rō, chí nuū maá Jitoho yō ni nihín rí: Jeē maá jecuāā jeē ní nastúu de Jitoho yō Jesús, te ni quihin ya pan. ²⁴Te ni nacuatáhú yá, te ni tahuñ cuéchí yá, te ni cahān yā jíin tēe cáscuáha jíin yá: Quihin te caji rō jijnáhan ró, chí yáha cúu yiqui cúñu rí jeē ni sócō rí jeē siquī rō. Te níni caji rō súcuan jeē cáñuhun ni rō ruhū jeē ni jíhī rí jehē rō. Achí yá. ²⁵Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñuhun copa yáha cúu niñī rí jeē sácútu contrato jeē jeē jnáma ri ñayuu. Te tāca jínu jeē cájilhi ró, te nucūhun ni rō ruhū. Achí yá. ²⁶Chí tāca jínu jeē cáyeji rō pan un te cájilhi ró copa un, súcuan cástéén rō jeē ni jíhī Jitoho yō jehē yō. Te súcuan na sáha ró ndé quivī ndíji ya.

Ndeese caji yñíuhún i Cena yā

²⁷Te núu na-ni ñayuu caji i pan un chí coho i copa Jitoho yō ún, te núu tu sáha yñíuhún i nuū Yaā Dios, núu súcuan te sáha i cuēchi jeē tu íyó yñíuhún i siquī yiqui cúñu maá Jitoho yō jíin síquī niñī yā. ²⁸Núu súcuan te coto ndee rō maá ró núu íyó ndoo ánuá rō jeē tú cuēchi ró. Te sáá te cuu caji rō pan un te coho ró copa un. ²⁹Chí núu iin ñayuu tu

yéji tu jíhi yíñúhún i te tu núcūhun ni i jeē yiqui cúñu yā cúu, ñayuu ún chi nihin i castigo núu na caji i coho i. ³⁰Jeē yúcuan cúu jeē iyó cuéhē ñayuu cácuñu jíin jéé ní cacuxíí, cáhiyo mēñu ró. Te sava i je ni cajihí. ³¹Te núu coto ndee yō maá yó nde ná tu caji yō, te Jitoho yō ma cuáha ya castigo yohó. ³²Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetú yō jíin ñayuu ñayiví.

³³Ñānī mánī, núu súcuan te jeē cándutútú ró jeē caji rō Cena yā, te condetu ró te caji inuú ró. ³⁴Te núu ñin ñayuu jíí i sōco, te xihna gā na caji i vehe i návāha ma stívi i nuú cándutútú ró. Te súcuan te ma cuáha ya castigo i. Te quiví jécondēhe rí rohó te cachi rí ndese coo sava ga jniñu.

Siquí tāca táhū jeē jéhe Espiritu

12 Hermano, cúní rī jeē na jécūhun ni rō siquí tāca táhū jeē jéhe Espiritu nuú yō, suu tāca modo jejniñu ñin ñin yó núu Yaā Dios.

²Te cājini rō jeē ná ni cuu ró ñayuu ná tu candíje, te ni cacondihvī ni rō ni cachíñúhún ró ídolo ñihín. ³Te vijna te na jécūhun ni rō jeē núu ndé ñayuu cahán ndevāha i siquí Jesús, te nasūu jíin poder Espiritu Yaā Dios cúu jeē cahán i súcuan. Te ni ñin i ma cúu cahán i jeē Jitoho i cúu Jesús, te núu tu ndéé poder Espiritu Santo ini i.

⁴Te sñin sñin tahū jéhe ya jeē cuajniñu ñin ñin yó núu yā, te ñin-ni máá Espiritu cúu jeē jéhe. ⁵Te sñin sñin jéjniñu yó, te nuú maá ñin-ni

Jitoho yō jejniñu yó. ⁶Te sñin sñin modo sáha yó jniñu ya, te ñin-ni Yaā Dios cúu jeē sáha jniñu un jíin yó. ⁷Te nuú ná ñin ná ñin yó ní jéhe Yaā Dios tahū jeē sáha Espiritu yā jíin yó, návāha na sáha yó jéé ije jnāhan yó jíin jnúhun ya. ⁸Chi sava yó ní canihin tahū jeē ndichí cáhán yō jnúhun ya, sáha máá Espiritu. Te sava ga yō ni canihin yō jeē cúu jécūhun vāha ni yō te castūhun yó, te suni máá Espiritu sáha. ⁹Te nuú sava ga yō ni jéhe ya tahū jeē cúu cándíje nihin yó jéé sáha ya jeē jicán yō, te sava ga yō cúu sáha yó jéé ndúvāha ñayuu cácuñu, te suni máá Espiritu sáha. ¹⁰Te sava ga yō cúu sáha jniñu jéñu jíin fuerza Yaā Dios. Te sava ga yō cúu nácani jnúhun ya. Te sava ga yō ni sáha ya jeē nácuni yō tāca jnúhun, núu vēji nuú Espiritu yā chí tuú. Te sava ga yō ni nihin tahū jeē cahán yō tñini yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnāhan yó jíin inga yuhu ún. ¹¹Te tāca táhū yáha, chi ñin-ni máá Espiritu sája, te sñin sñin jéhe ya nuú ñin ñin yó, ndese núnjahan ni maá yá.

Ndihí yó cúu nájñūhun ñin na yiqui cúñu

¹²Chi nájñūhun ñin yiqui cúñu iyó cuéhē parte, súcuan cúu yó jíin Cristo jeē cúu yó nájñūhun yiqui cúñu yā, chi ñin na cúu yó jíin yá. Te vēsú cuéhē parte cácuu yó te ñin-ni cúu yó, nájñūhun ñin yiqui cúñu jeē iyó cuéhē parte. ¹³Chi ñin na ni canduu yó jíin yá ni sáha ñin-ni máá Espiritu ná ni cajendute yó. Súcuan cúu vēsú cúu yó ñayuu

hebreo chí ñáyuu griego, vēsú mozo jeē ní jeen ñayuu chí tēe sájniñu cuenta maá. Te ndihi yó chi ñin-ni Espiritu ni canihin yó.

¹⁴Te ñin yiqui cúñu chi nasūú ñin-ni parte cúu, chí sa cuehē parte cúu. ¹⁵Te núu jehē cahān: Nasūu cuenta yiqui cúñu cúu ri, chí nasūú ndaha cúu ri, te tuú chi parte yiqui cúñu cúu nahín. ¹⁶Te núu sōho cahān: Nasūu cuenta yiqui cúñu cúu ri, chí nasūu tñūu cúu ri, te tuú chi parte yiqui cúñu cúu nahín. ¹⁷Núu nń yiqui cúñu yó cúu tñūú, ¿te ndese cuni sōho yó núu súcuan? Te núu nń yiqui cúñu yó cúu sōho, ¿te ndese cuaan yó xicō núu súcuan? ¹⁸Te Yaā Dios ni chujnáhan ya ñin ñin parte yiqui cúñu, nájñūhun cúní yā jeē coo. ¹⁹Chi núu ñin-ni parte cúu ndihi, te nasūú ñin nń yiqui cúñu cúu núu súcuan. ²⁰Te tuú chi cuehē parte iyó, te ñin-ni yiqui cúñu cúu.

²¹Te ni ma cúu cahān tñūu jíin ndaha: Tu jíni ñúhún rí rohó. Te ni xiní ma cúu cahān jíin jéhē: Tu jíni ñúhún rí rohó. ²²Chi sa suhva tāca parte yiqui cúñu jeē jéni ni yó jeē núu ga fuerza, suu cúu jeē cánuú gá. ²³Te tāca parte yiqui cúñu jeē jéni ni yó jeē tu cáa vāha, suu cúu jeē yucún gá chúhun yó sahma. Te parte jeē tú-ni luu cáa, sa vāha ga jési yó. ²⁴Chi parte jeē lúu cáa, tu cánuú jéē condihyū. Chi súcuan ni chujnáhan Yaā Dios yiqui cúñu, jeē yucún gá ndíto yó jéē tu cáa luu. ²⁵Súcuan ni sáha ya návāha ma cusñin tāca parte yiqui cúñu, chí sa chindéé nájñáhan vāha jíin jnáhan. ²⁶Te núu jétú ñin parte yiqui cúñu, te suni nń cáhnu-ni jétú. Te núu

ñin parte ndíto yúcún yó, te suni ndihi-ni parte quéndōo vāha.

²⁷Te rōhó jíináhan ró chí nájñūhun yiqui cúñu Cristo cácuu ró, chí ñin na cúu yó jíin yá. Te ná ñin ná ñin ró cúu ñin ñin parte yā. ²⁸Núu súcuan te sñin sñin jniñu ni jēhe Yaā Dios nuū tāca ñáyuu cácanđje jeē cácuu i nájñūhun ñin ñin parte yā: Te suu ñin parte yā cúu tācá apóstol jeē ní jeni ya xihna gā jeē scáca de jñūhun ya. Yūcuán na te jeē uú, tēe cánacani jñūhun ya, te jeē uní, tēe cástéén. Yūcuán na te ñayuu casáha jniñu jéñnu jíin fuerza yā, jíin ñáyuu casáha jeē ndúvāha ñayuu cácuuhū, jíin ñáyuu cachíndéé nájñáhan, jíin ñáyuu cándiso jniñu, jíin ñáyuu cácahān sñin sñin yuhu jeē tu cájecūhun ni. ²⁹¿A ndihi yó cácuu apóstol, chí naún? ¿A ndihi yó cánacani jñūhun? ¿A ndihi yó cástéén? ¿A ndihi yó cuu sáha jniñu jéñnu? ³⁰¿A ndihi yó cuu sáha jeē ndúvāha ñayuu cácuuhū? ¿A ndihi yó cuu cahān sñin sñin yuhu? ¿A ndihi yó cuu nacastūhún yuhu ún, chí naún? Tuú chí sñin sñin tahū ni canihin yó. ³¹Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñin jeē vāha ga nuū tāca gá tahū ún, suu jñūhun cúndáhú ni jnáhan.

Jñūhun jeē cundáhú ni jnáhan

13 Vēsú núu cuu cahān yó tijní yuhu jeē cácahān ñayuu chí jéē cácahān ndajéhé Yaā Dios, te núu tu cúndáhú ni yó jnáhan yó, te jñūhun cahān yó un cúu nájñūhun ñin tambor jeē ndaxín cáján chí ñin

platlillo jeē ndaxín cáxín sánee sōho ñayuu. ²Te vēsú cuu nacani vāha yó jnúhun ya, te cuu jecūhun ni yō tāca jnúhun sāhi yá jíin tāca jnúhun ndíchí, te núu tu cúndáhú ni yō jnáhan yó, te tu ndé jéjníñu cuiti yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnáhan yó, te tu ndé jéjníñu cuiti. ³Te vēsú na sája yó ndíhi jeē névāha yó cuu ñayuu ndahú, te vēsú núu cuāha yó jnúhun cahmu ñayuu yohó jéē siquí jnúhun ya, te núu tu cúndáhú ni yō jnáhan yó, te tu ndé jéjníñu cuiti.

⁴Ñayuu cundáhú ni chi íyó paciencia jíin jnáhan, te íyó mání ni, te tu cúcuésún ni. Te tu sándúxí, te tu sátéyí máá. ⁵Tu sájéē ni, tu ndúcú jéē cúu máá-ni, tu quítí ni, tu ñúhun ni jnúhun quítí ni. ⁶Tu cúsiñ ni jíto jniñu néé cásáha jnáhan, chi sa cúsiñ ni jíin jniñu vāha. ⁷Ñayuu cundáhú ni chi ndíhi jéhnde ni ndoho jehē jnáhan, te tu jécuiñi jeē candíje jnáhan, jíin jéē ñúhun ni jeē squícu jnáhan, jíin jéē jéndeyí ni jíin jnáhan.

⁸Jnúhun cúndáhú ni chi ma náā cuiti. Te quiji quiví jeē tuá nacani i jnúhun, ni tuá cahān i tijní yuhu, ni tuá jíni ñúhún jnúhun ndíchí. ⁹Chi tu jíni vāha vāha yó vijna, te jnúhun cánacani yó suni jecu-ni cúu. ¹⁰Te núu na quíji quiví jeē cúni yō ndíhi, yūcuán na te tuá coo jeē jíni yó jecu-ni.

¹¹Ná ni cuu yó súchi lúlí te ni cahān yō, ni jeni ni yō, ni jecūhun ni yō nájnūhun sūchi lúlí. Te ná ni jehnu yó te ni stóo yó modo sūchi lúlí. ¹²Te suni súcuan, jecu-ni

jécūhun ni yō vijna, nájnūhun jeē jíto yó núu ñin espejo jeē tú ndijin vāha. Te cúcuéé gá te jecūhun cáji ni yō ndíhi. Te vijna chi jecu-ni jíni yō, te cúcuéé gá te cuni vāha yó ndese Yaā cúu ya, nájnūhun jíni vāha ya yohó ndese ñayuu cúu yó. ¹³Núu súcuan te íyó úní jnúhun jeē quéndōo cutú níí cáni: Jeē candíje nihin yó jéē squícu ya jeē ni jéjníñu ya, jeē cócuhun ni yō tāca jéē vāha coo, jíin jéē cundáhú ni yō jnáhan yó. Te jnúhun cúndáhú ni chi jéhnú ndasí gá cúu nuū tāca jéē yáha.

Siquí jeē cácahān i tijní yuhu

14 Na cóndihvī ni rō cundáhú ni rō jnáhan ró, te suni cóndihvī ni rō cacān rō tāca táhū jeē jéhe Espíritu. Te tahū jeē cánuú gá cúu jeē nácani ró jnúhun ya. ²Chi tēē névāha tahū jeē cahān de tijní yuhu jeē tu jécūhun ni de, chi máá-ni Yaā Dios jíni jeē cahān de, nasūu ñáyuu. Chi ni ñin i ma jécūhun ni jeē cahān de. Chi sáha Espíritu jeē cahān de tāca jnúhun yísāhí. ³Te sa suhva tēē nácani jnúhun ya, chi jíin ñáyuu cahān de návāha ije i jíin jnúhun ya, te stáhvī ni de i, te cáhán ndeyí ni de jíin i. ⁴Te tēē jeē cahān tijní yuhu, chi máá-ni de íje jíin jnúhun ya. Te tēē jeē nácani jnúhun ya, chi sa suhva sáha de jeē ñáyuu cácaandíje íje i jíin jnúhun ya.

⁵Nújnahan ni ri jeē ndíhi ró cuu cahān rō tijní yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chi jéhnú ga jniñu sáha tēē nácani jnúhun ya vēsú tēē cáhán tijní yuhu. Chi núu

tú tēe castūhun jnúhun cáhán de, te ma cuajníñu jeē íje ñayuu cácadíje.

⁶Jeē yúcuán hermano jijnáhan ró, núu na jéé rī nuū rō, te núu cahān rī tijni yuhu jeē tu jécūhun ni rō, ¿te ndé cuajníñu ún? Te núu na cáhán rī ñin jeē ni stéén yā, chí ñin jeē cútūhva ró jnúhun ndaā, chí ñin jeē nácani ri jnúhun ya, chí ñin jeē steén rī nuū rō, yúcuán cúu jeē cuajníñu.

⁷Sáha yó cuenta jeē nájnūhun instrumento música, vēsú tu técu, te cuu cata, nájnūhun flauta jíin arpa. Te núu tu jíta sñin sñin nota, ¿te ndese cuni yō na yaa jíta? ⁸Te núu corneta tu jécú cájí, te ni ñin tēe ma sātūhva de quihñin de guerra. ⁹Te suni súcuán rōhó jijnáhan ró, núu tu cáhán cají ró jnúhun jecūhun ni ñayuu, ¿te ndese cuni i na vé cahán rō? Chi jnúhun cáhán rō ndíso tachī cuahān jíin. ¹⁰Te ndaā chi íyó cuéhē yuhu ini ñayīví, te tācá yuhu chí íyó ñayuu jécūhun ni. ¹¹Te núu tu jécūhun ni yō yuhu cáhán ñin tēe, te cúu yó nájnūhun tēe ñuu jicá núu tēe cáhán, te suni nájnūhun tēe ñuu jicá cúu de nuū maá yó. ¹²Jeē yúcuán rōhó jéé cácuani ndasí ró nihñin rō tahū jeē jéhe Espíritu, na cácan rō tahū jeē sáha jeē íje ñayuu cácadíje jíin jnúhun ya.

¹³Núu súcuán te ñayuu jeē cahán inga yuhu jeē tu jécūhun ni i, na cácan tahú i jeē cuu nacastūhún i yuhu ún. ¹⁴Chi núu jicán tahú yō jíin inga yuhu, te maá ánuá-ni yó cúu jeē jicán tahú, te tu ndé jéjníñu nuū jeē níjnūní yō. ¹⁵¿Ndese sáha yó núu súcuán? Na cácan tahú yō jíin ánuá yō, te suni jíin jéé níjnūní

yō. Na cáta yó yaa ñi jíin ánuá yō, te suni jíin jéé níjnūní yō. ¹⁶Chi núu nácuatáhú ró máni jnúhun jeē ní quiji nuū ánuá rō te tu jécūhun ni rō, núu súcuán te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuiti de na jnúhun cáhán rō. ¹⁷Ndaā chí vāha nácuatáhú maá ró, te inga de chí tú na vé nihñin de jeē íje de jíin jnúhun ya. ¹⁸Na cútahū rī nuū Yaā Dios jeē cahán gā rī jíin tijni yuhu vēsú maá ró jijnáhan ró. ¹⁹Te vēsú súcuán te núu íne ri nuū cáyūcu tútu ñayuu cácadíje, te nújnahan gā ni rī cahān rī uhñin-ni jnúhun jeē jécūhun ni i te stéén nuū i, vēsú jeē cahán rī uxī mil jnúhun jíin inga yuhu jeē tu jíni cuiti i.

²⁰Hermano jijnáhan ró, ma cáni ni rō nájnūhun sūchi lúlí, chí sa suhva na íje ró jéé jecūhun vāha ni rō. Te coo ró nájnūhun sūchi lúlí jéé tu jíni i jniñu néé. ²¹Te yósó núu tútu ley yā jenahán: Jíin jnúhun cácahān tēe inga yuhu, jíin jnúhun cácahān tēe ñuu jicá, sáha ri jeē cúni sōho ñayuu yáha jnúhun ri. Te ni jíin súcuán ma sáha i cuenta jnúhun cahān rī, achí maá Jítoho yō. ²²Núu súcuán te tahū jeē cahán yō tijni yuhu, yúcuán cúu ñin jeē steén poder Yaā Dios nuū ñayuu tu cácadíje, nasūu núu ñayuu cácadíje. Te jeē nácani yó jnúhun ya, yúcuán cúu jeē steén nuū ñayuu cácadíje, nasūu núu ñayuu tu cácadíje. ²³Núu súcuán te núu ndíhi ró ñayuu cácadíje cáhiyo tútu, te tāca ró cácahān sñin sñin yuhu, te quívicoo ñayuu tu jécūhun ni jíin ñayuu tu cácadíje, ¿te á má cahán i jeē ní canduu loco rō? ²⁴Te

núu tāca ró cánacani jnūhun ya, te núu quīvi iin tēe tu cándíje chí iin tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de máá de jíin jnúhun cánacani ró. ²⁵Te nucūhun ni de tāca jéē ní jeni yuhu ni de jíin ánuá de. Yūcuán na te jecuiñī yití de te chiñúhún de Yaā Dios. Te cahān de jeē íne ndije Yaā Dios jíin ró jijnáhan ró.

**Siquī jeē yucún yíñúhún
na cóo nuū ndutútú yó**

²⁶Núu súcuan hermano jijnáhan ró: Nuū cándutútú ró te tāca ró coo iin yaa iī cata ró, chí iin jnūhun stéén rō, chí iin jnūhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jéē nácástūhun ró jnūhun inga yuhu ún. Te ndíhi ún na sáha ró návāha ije ñayuu cácañdije jíin jnúhun ya. ²⁷Te núu cáhiyo tēe cahān inga yuhu, te na cáhán uū de chí únī-ni de, te ná iin ná iin de na cáhán. Te suni jíni ñúhún jéē nacastūhún iin tēe jnūhun ún. ²⁸Te núu tu íyó tēe jeē cúu nacastūhun jnúhun ún, te tēe cácahān inga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios. ²⁹Te suni súcuan tēe cánacani jnūhun, na cáhán uū de chí únī de, te sava ga rō nacani ni rō núu íyó ndāá jeē cácahān tēe ún. ³⁰Te núu inga tēe néne ni nihīn de iin jnūhun jeē ni stéén yā nuū de, núu súcuan te tēe cáhán na jecuiñī jeē cahán de, návāha cahān inga tēe ún. ³¹Te súcuan te ná iin ná iin ró cuu nacani ró jnúhun jeē stéén yā nuū rō, návāha cutūhva ró te coo ndeyí

ni rō. ³²Te tēe cánacani jnūhun, jíni ñúhún cuatáhú de jeē nácani inga tēe jnūhun te jecuiñī jeē cahán maá de. ³³Chi Yaā Dios cuní yā jeē coo nayúú méhñu ró, násūu jéē sacā núu cuvaā rō.

Te nájñūhun casáha tāca grupo hermano cácañdije, ³⁴suni súcuan táca ñahan cándutútú jíin ñayuu cácañdije, na cóo nayúú ña. Chi tú vāha jeē cahán ña, chi sa cuatáhú ña nájñūhun cáhán tutu ley yā. ³⁵Te núu cuní ña cucáñnu ni ña iin jnūhun, te nde vehe na cájñúhún ña yíi ña. Chi jnūhun canu cúu jeē cahán iin ñahan méhñu núu cándutútú ró.

³⁶Te na sáha ró cuenta jeē tu ní quénda jnūhun Yaā Dios nuū maá ró jijnáhan ró, te nasūu máá iin máá ró ní cánihīn jnūhun ya. ³⁷Núu iin tēe jéni ni de jeē tēe nácani jnūhun ya jíin tēe névāha Espiritu cúu de, núu súcuan te na cuájñúhún de jeē jniñu ní ndacu Jitoho yō cúu jeē tēe ri yāhá. ³⁸Te núu tu jétáhú de jnūhun yáha, suni ma cuatáhú yó de.

³⁹Núu súcuan, ñānī mánī jijnáhan ró, na cóndihvī ni rō nacani ró jnúhun ya, te ma cási rō nuū tēe cácahān sīin sīin yuhu. ⁴⁰Te yúcún yíñúhún na sáha ró táca jniñu.

Jnūhun jeē ní natecu Cristo

15 Hermano jijnáhan ró, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chi je ni cajetáhú ró, te suni cáhiin nihīn ró jíin. ²Te suni jíin jnúhun ún te ni jnama ya rohó, te núu cáhiin nihīn ró jíin jnúhun ni nacani ri nuū rō, te núu tu ní cácañdije cáha ró.

³Chi jnūhun cánuú gá jeē ni nīhīn maá rí ni nastéén rī nuū rō: Jeē ni jíhī Cristo siquī cuēchi yó, nájnūhun je cáhán tutu iī nde jenahán. ⁴Te ni quindūji ya, te ni natecu yā nuū uní quivī, nájnūhun cáhán tutu iī. ⁵Te ni nane ya nuū Pedro. Te sáá te ni nane ya nuū ndihúxí gā apóstol. ⁶Te sáá te ni nane ya nuū vihyá gā uhūn ciento hermano jeē cáyūcu tūtú. Te sava i tēcu gā nde vijna, te sava i je ni jíhī. ⁷Te sáá te ni nane ya nuū Jacobo, yūcuán na te nuū ndihī ga apóstol.

⁸Te jeē sándihí na te ni nane ya nuū maá rí. Te nájnūhun iin jeē ní cacu yúte, súcuán cúu jeē iin sanaa-ni te ni nduu ri apóstol. ⁹Chi tēe núu ga nuū tāca gá apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cácanđije nuū Yaā Dios. ¹⁰Te siquī jeē ni sáha Yaā Dios jeē váha ruhū, jeē yúcuán cúu ri apóstol vijna. Te jeē ni sáha ya jeē váha ruhū, chi tú cāha ní cúu, chi sa ni scáca ga rī jnūhun ya vēsú tāca gá tēe apóstol. Te nasūu máá rí ni sáha, chi Yaā Dios ni sáha ya jeē váha un jíín rí. ¹¹Núu súcuán te vēsú ruhū chí tāca gá tēe ún, súcuán cánacani ri jnūhun, te súcuán ni cacandíje rō.

Jnūhun jeē natecu ndīyi

¹²Te jeē cánacani ri jnūhun Cristo jeē ní natecu yā mēhñu ndīyi, ¿te naun cácahān sava rō jēe ma nátecu ndīyi? ¹³Chi núu jeē tú natecu ndīyi, te suni tu ní nátecu Cristo nuú. ¹⁴Te núu jeē tu ní nátecu Cristo, te cánacani cāha rí jnūhun ya nuú, te suni cácanđije cāha rō núu. ¹⁵Chi núu jeē súcuán cúu núu, te cácuu

ri tēe jeē tu cácahān ndaā jnūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndije ndīyi, núu súcuán te tú ndaā jeē ní nastécu Yaā Dios Cristo. ¹⁶Chi núu tú natecu ndīyi, te ni Cristo suni tu ní nátecu yā nuú. ¹⁷Te núu tu ní nátecu Cristo, te cácanđije cāha rō te cándiso iī gā rō cuēchi rō núu. ¹⁸Te núu jeē súcuán cúu núu, te suni je ni cajnahñu ndetū ñayuu ni cacandíje Cristo. ¹⁹Chi núu tú natecu ndīyi, te núu máá iin-ni siquī vida yáha ñūhun ni yō jeē sáha Cristo jeē váha yóhó, núu súcuán te ndahú ndasí gá cácuu yó vēsú tāca gá ñayuu, chi cácanđije cāha yó nuú.

²⁰Te tuú chi íyó ndaā jeē ní natecu Cristo mēhñu ndīyi. Te máá yá cúu jeē xíhna gā ni natecu nuū tāca gá ndīyi jeē natecu. ²¹Chi siquī jeē ni stfvi iin-ni tēe Adán, te ni quejéé jíhí ñayuu. Te suni súcuán siquī jeē ni sáha iin-ni tēe Cristo, te natecu ñayuu. ²²Chi nájnūhun cájihī ndihī yó síquī jeē cácuu yó yúcuán Adán, suni súcuán natecu ndihī yó síquī jeē yfhi yó ndaha Cristo. ²³Te ná iin ná iin ndese ndíquín jnáhan máá: Xíhna gā Cristo ni natecu yā, te sáá te quivī ndíji ya te natecu tāca ñáyuu yfhi ndaha ya. ²⁴Yūcuán na te jínu tiempo, te snāā yā poder tāca enemigo jeē cujéhnu jíín jēe ndácu jniñu jíín jēe iyó poder. Te ndihī jeē ndácu ya jniñu nuū, nacuāha ya nuū Tatá yā Yaā Dios. ²⁵Chi cánuú jēe ndacu Cristo jniñu nde quiji quivī jeē quénde Yaā Dios poder tāca jēe jíto uhū nuū Cristo, te stóho ya. ²⁶Te jeē sándihí na te

snáa yā cuehyi jéhni ñayuu. ²⁷Chi cáhán tutu ii jeē sáha Yaā Dios jeē cujéhnú Cristo siquī ndíhi, te cuatáhú núu yā. Te jeē cáhán jeē cujéhnú ya nuū ndíhi-ni, te jíní vāha yó jéē maá Yaā Dios ma quíhi ya ndaha Cristo, chi Yaā Dios cúu jeē ni chíhi tǎcá un ndaha Cristo.

²⁸Te ná ni quívi ndíhi ún ndaha Cristo, yūcuán na te suni máá Cristo jeē cúu ya Sēhe, quívi ya ndaha Tátá yā, Yaā jeē ní chihi tǎcá un ndaha ya. Te súcuán te máá Yaā Dios jnií ya ndíhi-ni.

²⁹Te íyó ñáyuu cájendute jehē ndíyi. Te núu tú natecu cuiti ndíyi, ¿te najehē cájendute i jehē ndíyi núu súcuán?

³⁰Te ruhū jijnáhan ri, ¿najehē cúu jeē ndiquivī cájendeyí ni rī jító ri jnūndóho cuu rī, te núu tú natecu ndíyi? ³¹Hermano, nájñūhun íyó ndáa jeē cúsií ni rī siquī jeē cácandíje ró Jítóho yō Jesucristo, suni súcuán íyó ndáa jeē ndiquivī nducú ñáyuu cahni ruhū siquī jñíñu ya. ³²Te jeē ní ndoho ri ni casáha tēe xeēn ñuu Efeso, jeē cácuu de nájñūhun quiti xéén, ¿te na vé nihín rī siquī un núu súcuán? Chi núu tú natecu ndíyi, te cuu cahán yō nájñūhun áchí iin jñūhun: Na cúsií ni yō caji yō coho yó, chi sanaa te sajñē te cuu yō, achi yō nuú.

³³Ma cuáha ró jñūhun stáhú ñáyuu rohó. Chi áchí iin jñūhun: Núu cájica ró jíní ñáyuu neé, te stívi i róhó jéē tuá caca ndaā rō.

³⁴Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuiti rō ndese Yaā cúu Yaā Dios. Súcuán cáhán rī návāha na cúcanu rō.

Ndese natecu ndíyi

³⁵Te sanaa te cahán iin rō: ¿Ndese natecu ndíyi? ¿Ndese coo yiqui cúñu i? achi rō. ³⁶Tu jécūhun cuiti ni rō núu súcuán. Chi cúu nájñūhun jeē cátají ró táca tata chíji ñūhun návāha nane yucū i. ³⁷Te tata jeē quívi chíji ñūhun, núu trigo chí inga tata, chi nasūu yúcū cúu, chi máá núní-ni cúu. ³⁸Te cuéé gá te cane, chi Yaā Dios ni jēhe ya yucū tata ún, ndese ni nujnahan ni maá yá, te ná iin ná iin tata chi sín sín cáa yucū ni sáha ya. ³⁹Te suni súcuán tǎcá yiqui cúñu, chi tú inuú cándāa. Chi sín cáa ñayuu, te sín cáa quiti, te sín cáa saa, te sín cáa chācá. ⁴⁰Te suni súcuán cúu tǎca jéē iin andiví jíní táca jéē íyó ñáyiví. Te sín luu cáa jeē iin andiví, te sín luu cáa jeē íyó ñáyiví. ⁴¹Te sín ndíndēe níandii, te sín ndíndēe yóō, te sín ndíndēe táca quími. Te tǎcá iin iin quími chi suni sín sín ndíndēe. ⁴²Te suni súcuán coo jíní ndíyi jeē natecu. Ndíyi jeē chíndūji yó chi téhyū, te jeē nastécu yā chi ma cúu gā. ⁴³Jeē chíndūji yó chi ndáhú cáa, te jeē nastécu yā chi luu cujéhnú. Jeē chíndūji yó chi tú na fuerza, te jeē nastécu yā chi coo fuerza. ⁴⁴Jeē chíndūji yó chi iin yiqui cúñu cuenta ñayiví cúu, te jeē nastécu yā chi iin yiqui cúñu cuenta Espíritu yā cúu. Chi íyó yiqui cúñu cuenta ñayiví, te suni íyó yiqui cúñu cuenta Espíritu.

⁴⁵Chi súcuán yósó núu tútu ií: Adán, tēe xihna ñúhún, ni cuvāha de jíní vida cuenta ñayiví, áchí. Te Cristo cúu nájñūhun inga Adán uū, te máá yá cúu Espíritu jeē

jéhe vida. ⁴⁶Te nasūú yiqui cúñu cuenta Espíritu cúu jeē ní cuvāha xihna gā, chi sa suhva yiqui cúñu cuenta ñayīví, te sáá te nduu cuenta Espíritu. ⁴⁷Te cuenta ñayīví cúu tēe xihna ñúhún, chi ni cuvāha de jíin tícachā ñuhun. Te Adán uū jeē cúu máá Jítóho yō, chi nde andíví ní quiji ya. ⁴⁸Te ñayuu ñayīví yáha, chi cúu i jnáhan Adán jeē ní cuvāha jíin tícachā ñuhun. Te ñayuu jeē quívicoo andíví, chi ndúu i nájnūhun máá Yaā ní quiji nde andíví. ⁴⁹Chi jeē cáa yó nájnūhun tēe ni cuvāha jíin tícachā ñuhun, suni súcuan coo yó nájnūhun cáa máá Yaā ní quiji nde andíví.

⁵⁰Jnūhun yáha cástūhun rí nuū rō jijnáhan ró, hermano, jeē yiqui cúñu yō cuenta ñayīví yáha, ma cúu quīví ñuu nuū ndácu Yaā Dios jniñu. Chi jeē jihí cúu, te ma cúu quīví nuū cótecu níí cáni. ⁵¹Te cúní rī jeē na jécūhun ni rō jnūhun yáha jeē ní yisāhí: Nasūú ndíhi yó cuu, te ndíhi yó chi nasāma yiqui cúñu yō. ⁵²Chi quīví jeē cuécu sandíhí na trompeta, te ñin yachī-ni, nájnūhun ñin jeē nácuenī-ni yó, te nasama ya yohó. Chi cuecu trompeta un, te natecu tāca ndíyí jeē ma cúu gā i. Te tāca yó jeē cátecu yō quīví ún, chi nasama ya yiqui cúñu yō. ⁵³Chi jeē tehyú yāhá, cánuú nucūhun jeē ma téhyú gā. Te jeē jihí cánuú nucūhun jeē ma cúu cuítí gā. ⁵⁴Chi jeē jihí jeē tehyú, chi quiji quīví jeē nucūhun jeē ma cúu gā ma tehyú gā. Yūcuán na te cundaā jnūhun yósó núu tútu ii: Jíin poder yā ni snáa yā cuehyī jéhni ñayuu. ⁵⁵Cuehyī jéhni yóhó ¿ndese ga cuu sáha xeēn jíin yó? Chi natecu yō.

¿Te ndese ga cundeyí jíin yó? Chi snáa yā. Achí tutu. ⁵⁶Chi cuēchi cúu jeē sáha jeē cundeyí cuehyī jéhni ñayuu. Te ley yā jenahán sáha jeē náne cuēchi siquī yō. ⁵⁷Te na cútahū yō nuū Yaā Dios, chi jíin máá Jítóho yō Jesucristo sáha ya jeē cundeyí yó siquī cuēchi jíin síquī jnūhun cuu yō.

⁵⁸Jeē yúcuan, ñání mání, cuiñí ñihin ró te ma cáca yátá ró jijnáhan ró. Te níni na sájniñu vāha ró jíin jniñu máá Jítóho yō. Chi je cájini rō jeē tu cásájniñu cāha ró jíin máá Jítóho yō.

Siquī jeē cáquin i xūhún cuu tācá hermano

16 Te vijna te cahān rī siquī xūhún jéē cáquin rō cuu hermano cácandíje cándoho ndáhú. Suni na sáha máá ró jijnáhan ró nájnūhun ni ndacu ri nuū tāca grupo ñayuu cácandíje ichi Galacia. ²Tācá domingo te ná ñin ná ñin ró chuvāha sñin ró jecu xūhún, núu ndese ni nihín maá ró, návāha quivī jeē jinú rī nuū rō te je íyó túhva. ³Te jeē jeé rī, te cuāha ri carta nuū tāca tēe jeē nácāji ró, te tají rí de quingoo de nuū tācá hermano cáyūcú Jerusalén, quisiáha de xūhún jéē ní casocō rō. ⁴Te núu íyó vāha jeē quihín rī, te suni quihín rī jíin de jijnáhan de.

Jeē cahán Pablo siquī jeē quícondēhe de ñayuu cácandíje

⁵Te jeē jeé rī nuū rō jijnáhan ró, te jini ñúhún jeē xihna gā jeē rī región Macedonia, yūcuán na te jeé rī ñuu rō Corinto. ⁶Te sanaa te quendōo ri jíin ró jijnáhan ró jecu

tiempo, chí sanaa te coyūcu yó níí tiempo mījin. Yūcuán na te cuu chindéé ñáhán ró ruhū, núu ndé chi quíhín tucu ri. ⁷Chi tu cúní rī jeē rī nuū rō vijna te yāha yachī rī quihīn rī, chí ñūhun ni rī jeē quendōo ri jíin ró jecu tiempo, te núu cuāha Jítoho yō jnūhun. ⁸Te cone ri ñuu Efeso yāhá nde na yāha quivī Pentecostés. ⁹Chi coo cuehē ñayuu scandíje ri, te vāha quihīn jniñu Jítoho yō. Te suni íyó cuéhē ñayuu cácuu contra.

¹⁰Te núu na jéé Timoteo, te sáha ró jéé coo sīi ni de mēhñu ró, te ni iin ma cáni ni de siquī. Chi suni jniñu máá Jítoho yō sáha de, nájñūhun máá rí. ¹¹Núu súcuan te ni iin ró má sajéé ni rō nuū de. Chi sa suhva chindéé ñájñáhan ró jíin de jeē na quíhín gā de, te coo ndeyí coo sīi ni de, návāha ndiji de coto jnáhan ri jíin de. Chi ruhū jíin sava ga hermano cándetu ri de.

¹²Te hermano Apolos chi ni cahān ndahú rí jíin de jeē na jéé de jíin sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándīhí

¹³Ndito coo ni rō jijnáhan ró, te cuiñi nihin ro jíin jnúhun cá candíje ró. Te téyí na cóo ni rō, te na cóo fuerza ini rō. ¹⁴Te tāca jéé casáha ró, na sáha ró jíin jnúhun cúndahú ni jnáhan.

¹⁵Hermano, cájini rō jeē xíhna gā ñayuu vehe Estéfanas ni cacandíje ichi Acaya. Te ni cajēhe i máá i nuū jniñu jeē chindéé ñáhán i tācá hermano cá candíje. ¹⁶Te cúní rī jeē suni máá ró jijnáhan ró, cuatáhú váha ró ñáyuu casáha súcuan, jíin táca ñáyuu cachindéé ñájñáhan te casájniñu siquī jniñu ya. ¹⁷Cúsīi ni rī jeē ní quiijcoo Estéfanas jíin Fortunato jíin Acaico, chí tēe yáha ni cajejñiñu de nuū rī jehē rō jeē tu ní cáhīyo ró jíin rí. ¹⁸Chi ni ndundeyí ni rī, te suni súcuan máá ró jijnáhan ró, ni casáha de. Te cánuu cuajnúhún ró tāca tēe cándāa súcuan.

¹⁹Sándeýí ni rō jijnáhan ró, áchí táca grupo ñayuu cá candíje cáyūcu Asia. Aquila jíin Priscila jíin ñáyuu cá candíje jeē cándutútú vehe de, cácahān i jeē sándeýí ndasí ni rō jíin jnúhun máá Jítoho yō. ²⁰Te tācá hermano cácahān i jeē sándeýí ni rō. Te jeē cahán rō jíin táca jnáhan ró, te yíñúhún techūhu ró ndaha i.

²¹Ruhū Pablo, jíin ndaha máá rí tēe ri jnúhun yáha jeē na sándeýí ni rō jijnáhan ró.

²²Te núu ndé iin tu íyó mánī jíin Jítoho yō Jesucristo, te na jnáhnú ndetū i núu súcuan. Te na cáhán yō: Jítoho ná, cúní na jéé yachī ndiji ní.

²³Te ñūhun ni rī jeē maá Jítoho yō Jesucristo na sáha ga yā jeē váha rōhó jijnáhan ró. ²⁴Te manī rī jíin ró jijnáhan ró jéé cá candíje ró Cristo Jesús. Súcuan na cóo. Amén.